

1735
63



唐太宗御撰晉書凡一百三十篇總一百三十一卷

帝紀十卷

志二十卷

列傳七十卷

載記三十卷



新嘉坡
此係明治
八年八月
廿八日
由山田一
郎君以贈
所購以贈
新嘉坡
圖書印

及古開
尾五

皇明崇禎改元歲在著雍執徐陬月元宵琴川毛氏開雕

晉

毛氏

晉書載記序

古者帝王乃生奇類淳維伯禹之苗裔豈異類哉反首衣皮殄羶
飲漣而震驚中域其來自遠天未悔禍種落彌繁其風俗險詖性
靈馳突前史載之亦以詳備軒帝患其干紀所以徂征武王竄以
荒服同乎禽獸而於露寒之野候月覘風覩隙揚埃乘間騁暴邊
城不得緩帶百姓靡有室家孔子曰微管仲吾其被髮左衽矣此
言能教訓卒伍整齊車甲邊場旣伏境內以安然則燕築造陽之
郊秦塹臨洮之險登天山紀一作絕地脉苞玄菟欵黃河所以防夷狄
之亂中華其備豫如此漢宣帝初納呼韓居之亭鄣委以候望始
寬戎狄光武亦以南庭數萬徙入西河後亦轉至五原連延七郡
董卓之亂則汾晉之郊蕭然矣郭欽騰牋於武帝江統獻策於惠
皇皆以爲魏處戎夷繡居都鄙請移沙塞之表定一般周之服統

則憂諸并部欽則慮在盟津言猶自口元海已至語曰失以豪釐
晉卿大夫之辱也聰之誓兵東兼齊地曜之馳旆西踰隴山覆沒
兩京蒸徒百萬天子陵江御物分據地險迴首中原力不能救割
長淮以北大抵棄之胡人利我艱虞分鑣起亂晉臣或阻兵遐遠
接武効尤大凡劉元海以惠帝永興元年據離石稱漢後九年石
勒據襄國稱趙張氏先據河西是歲自石勒後三十六年也重華
自稱涼王後一年冉閔據鄴稱魏後一年符健據長安稱秦慕容
氏先據遼東稱燕是歲自符健後一年也儁始僭號後三十一年
後燕慕容垂據鄴後二年西燕慕容冲據阿房是歲也乞伏國仁
據枹罕稱秦後一年慕容永據上黨是歲也呂光據姑臧稱涼後
十二年慕容德據滑臺稱南燕是歲也秃髮烏孤據廉川稱南涼
段業據張掖稱北涼後三年李玄盛據敦煌稱西涼後一年沮渠

蒙遜殺段業自稱涼後四年譙縱據蜀稱成都王後二年赫連勃勃據朔方稱大夏後二年馮跋殺離班據和龍稱北燕提封天下
十喪其八莫不龍旌帝服建社開枋華夷咸暨人物斯在或篡通
都之鄉或擁數州之地雄圖內卷師旅外并窮兵凶於勝負盡人
命於鋒鏑其為戰國者一百三十六載抑元海為之禍首云

晉書本傳

陳壽字承祚巴西安漢人也少好學師事同郡譙周仕宦爲觀閣令史宦人黃皓專弄威權大臣皆曲意附之壽獨不爲之屈由是屢被譴黜遭父喪有疾使婢丸藥客往見之鄉黨以爲貶議及蜀平坐是沉滯者累年司空張華愛其才以壽雖不遠嫌原情不至貶廢舉爲孝廉除佐著作郎出補陽平令撰蜀相諸葛亮集奏之除著作郎領本郡中正撰魏吳蜀三國志凡六十五篇時人稱其善敘事有良史之才夏侯湛時著魏書見壽所作便壞已書而罷張華深善之謂壽曰當以晉書相付耳其爲時所重如此或云丁儀丁廙有盛名於魏壽謂其子曰可覓千斛米見與當爲尊公作佳傳丁不與之竟不爲立傳壽父爲馬謖參軍謖爲諸葛亮所誅壽父亦坐被髡諸葛瞻又輕壽壽爲亮立傳謂亮將略非長無應

敵之才言瞻惟工書名過其實議者以此少之張華將舉壽爲中書郎荀勗忌華而疾壽遂諷吏部遷壽爲長廣太守辭母老不就杜預將之鎮復薦之於帝宜補黃散由是授御史治書以母憂去職母遺言令葬洛陽壽遵其志又坐不以母歸葬竟被貶議初譙周嘗謂壽曰卿必以才學成名當被損折亦非不幸也宜深慎之壽至此再致廢辱皆如周言後數歲起爲太子中庶子未拜元康七年病卒時年六十五梁州大中正尚書郎范頽等上表曰昔漢武帝詔曰司馬相如病甚可遣悉取其書使者得其遺書言封禪事天子異焉臣等按故治書侍御史陳壽作三國志辭多勸誡明乎得失有益風化雖文豔不若相如而質直過之願垂採錄于是詔下河南尹洛陽令就家寫其書壽又撰古國志五十篇益都耆舊傳十篇餘文章竝傳于世


節錄宋書裴松之傳

裴松之字世期河東聞喜人博覽墳籍立身簡素年二十拜殿中將軍歷員外散騎侍郎國子博士太祖元嘉三年分遣大使巡行天下松之使湘州稱指轉中書侍郎司冀二州大中正上使注陳壽三國志松之鳩集傳紀增廣異聞旣成奏上上善之曰此爲不朽矣後續何承天國史未及撰述二十八年卒時年八十

晉書目錄

唐太宗文皇帝

御撰



帝紀十

志二十

列傳七十

載記三十

帝紀

第一卷

高祖宣帝 懿

第二卷

世宗景帝 師

太祖文帝 昭

第三卷

世祖武帝炎

第四卷

孝惠帝衷

第五卷

孝懷帝熾

孝愍帝鄴

第六卷

中宗元帝膺

肅宗明帝紹

第七卷

顯宗成帝衍

康帝岳

第八卷

孝宗穆帝聃

哀帝丕

廢帝海西公奕

第九卷

太宗簡文帝昱

孝武帝暉

第十卷

安帝德宗

恭帝德文

志

第一卷

晉書目錄

天文上

第二卷

天文中

第三卷

天文下

第四卷

地理上

第五卷

地理下

第六卷

律歷上

第七卷

四

律歷中

第八卷

律歷下

第九卷

禮上

第十卷

禮中

第十一卷

禮下

第十二卷

樂上

第十三卷

五

六

樂下

第十四卷

職官

第十五卷

輿服

第十六卷

食貨

第十七卷

五行上

第十八卷

五行中

第十九卷

五行下

第二十卷

刑法

列傳

第一卷

后妃傳上

宣穆張皇后

景懷夏侯皇后

景獻羊皇后

文明王皇后

武元楊皇后

武悼楊皇后

左貴嬪 諸葛夫人

胡貴嬪

惠賈皇后

惠羊皇后

謝夫人

懷王太后

元夏侯太妃

第二卷

后妃傳下

元敬虞皇后

荀豫章君

明穆庾皇后

成恭杜皇后

章周太妃

康獻褚皇后

穆章何皇后

哀靖王皇后

廢帝庾皇后

簡文宣鄭太后

簡文順王皇后

孝武文李太后

孝武定王皇后

安德陳太后

安僖王皇后

恭思褚皇后

第三卷

王祥

弟覽

何曾

子劭

遵

歐陽建

鄭沖

石苞

子崇

孫鑠

第四卷

羊祐

杜預 子錫

第五卷

陳騫 子輿

裴秀 子願 從弟楷 楷子憲

第六卷

衛瓘 子恒 孫璩 玠

張華 子禧 躄

劉卞

第七卷

宗室傳

安平獻王孚

子邕 邕弟義陽成王望 望子河間平王洪 洪子威 洪弟隨穆王整 整弟竟陵王琳 望弟太原成

彭城穆王權

王輔 輔弟翼 翼弟下邳獻王晃 晃弟太原烈王瓌 瓌弟高陽元王珪 珪弟常山孝王衡 衡弟沛順王景 孫紘 紘子俊

高密文獻王泰

子孝王畧 畧兄新蔡武哀王騰 畧弟南陽王模 騰子莊王確 模子保

范陽康王綏

子虓 濟南惠王遂 曾孫勲

譙剛王遜

子閔王承 承子烈王無忌 無忌子敬土恬 恬子忠士尚之 尚之弟恢之 恢之 允之 韓延之 恬弟愔

高陽王睦

任城景王陵 弟順 西河繆王斌

第八卷

宣五王文六王傳

平原王幹

琅邪王伾 子觀 滌 繇 淮

清惠亭侯京

扶風王駿 子暢 歆

梁王彤

齊王攸 子綦 贊 寔

城陽王兆

遼東王定國

廣漢王廣德

樂安王鑒

樂平王延祚

第九卷

王沉 子浚

荀顛

荀勗 子藩 藩子邃 閻 潘弟組 組子奕

馮紆

第十卷

賈充 孫謚 充弟混 族子模 鄭彰

楊駿 弟珧 濟

第十一卷

+

魏舒 弟智

李熹

劉寔 弟智

高光

第十二卷

王渾 子濟

王濟

唐彬

第十三卷

山濤 子簡 簡子遐

王戎 從弟衍 衍弟澄 郭舒

樂廣

第十四卷

鄭袤 子默 默子球

李胤

盧欽 子浮 弟琨 琨子志 志子謀

華表 子廙 廙子恒 廙弟嶠

石鑿

溫羨

第十五卷

劉毅 子暉 程衛

和嶠

武陔

任愷

崔洪

郭奕

侯史光

何攀

第十六卷

劉頌
李重

第十七卷

傅玄 子咸 咸從父弟祗

十一

第十八卷

向雄
段灼

閻纘

第十九卷

阮籍 兄子咸 咸子瞻 瞻弟孚 從子修 族弟放 放弟裕

嵇康
向秀

劉伶
謝鯤

胡母輔之 子謙之
畢卓

王尼
羊曼 弟聃

光逸

第二十卷

曹志
庾峻 子珉 珉弟敬

郭象
庾純 子專

秦秀

第二十一卷

皇甫謐 子方回
摯虞

束皙
王接

第二十二卷

郤詵
阮种

華譚
袁甫

第二十三卷

十三

愍懷太子通

子彪 臧尚

第二十四卷

陸機

孫拯

陸雲

弟耽 從父兄喜

第二十五卷

夏侯湛

弟淳 淳子承

潘岳

從子尼

張載

弟協 協弟亢

第二十六卷

江統

子彪 倬

孫楚

子衆 洎 纂 纂子統 綽

第二十七卷

羅憲

兄子尚

滕修

馬隆

胡奮

陶璜

吾彥

張光

趙誘

第二十八卷

周處

子玘 玘子勰 玘弟札 札兄子筵

周訪

子撫 撫子楚 楚子瓊 瓊子旭 撫弟光 光子仲孫

第二十九卷

汝南文成王亮

子粹 矩 兼 宗 熙 矩子祐

楚隱王瑋

趙王倫

齊王冏

鄭方

長沙厲王乂

成都王穎

河間王顥

東海孝獻王越

第三十卷

解系

弟結 結弟育

孫旂

孟觀

繆播

從弟胤

牽秀

皇甫重

張輔

李含

張方

閻鼎

索靖

子綝

賈疋

第三十一卷

周浚

子嵩 謨 從父弟馥

成公簡

苟晞

華軼

劉喬

孫耽 耽子柳

第三十二卷

劉琨

子羣 琨兄輿 輿子演

祖逖

兄納

第三十三卷

邵續

李矩

段匹磾

魏浚

族子該

郭默

第三十四卷

武十三王

元四王

第三十五卷

王導

子悅 恬 洽 劭 蒼 洽子珣 珣 劭子謐

第三十六卷

劉弘

陶侃

子洪 瞻 岱 夏 琦 旗 斌 稱 範 岱 兄子臻 秦弟興

第三十七卷

溫嶠

郗鑒

子愔 愔子超 愔弟曇 鑒叔父隆

第三十八卷

顧榮

紀瞻

賀循

薛兼

第三十九卷

十五

劉隗

刁協

戴若思

周顓

第四十卷

應詹

甘卓

卞壺

劉超

鍾雅

第四十一卷

孫惠

熊遠

王鑒

陳頤

高崧

第四十二卷

郭璞

葛洪

第四十三卷

庾亮

第四十四卷

栢彞

第四十五卷

王湛

荀崧

范汪

十三

子承 承子述 述子坦之 禕之 坦之子愷 愉 國寶 忱

子穉 羨

子穉 羨

子雲 雲弟豁 豁子石虔 虔子振 弟石秀 石民 石生

石綬 石康 豁弟祕 祕弟冲 冲子嗣 嗣子胤 嗣弟謙

子彬 義 蘇 弟悻 水 條 翼

弟修 徐寧

子承 承子述 述子坦之 禕之 坦之子愷 愉 國寶 忱

子穉 羨

子雲 雲弟豁 豁子石虔 虔子振 弟石秀 石民 石生

石綬 石康 豁弟祕 祕弟冲 冲子嗣 嗣子胤 嗣弟謙

子彬 義 蘇 弟悻 水 條 翼

弟修 徐寧

劉惔

張憑

韓伯

第四十六卷

王舒

王廙

王稜

虞潭

顧眾

張闔

第四十七卷

陸曄

何充

褚裒

蔡謨

諸葛恢

殷浩

第四十八卷

孔愉

陶回

丁潭

陶回

第四十九卷

謝尚

謝安

第五十卷

王羲之

子玄之 疑之 獻之 許邁

徽之 徽之子植之 弟操之

第五十一卷

王遜

蔡豹

羊鑒

劉胤

桓宣

朱伺

毛寶

劉遐

鄧嶽

朱序

第五十二卷

陳壽

王長文

虞傳

司馬彪

王隱

虞預

孫盛

于寶

鄧粲

謝沉

習鑿齒

徐廣

第五十三卷

顧和

袁瓌

江道

從弟淮 淮子績

子喬 喬孫山松 瓌弟猷 從祖準 準孫耽 耽子質 質子湛 豹

車胤

殷覲

王雅

第五十四卷

王恭

庾楷

劉牢之

子敬宣

殷仲堪

楊佺期

第五十五卷

劉毅

兄邁

諸葛長民

何無忌

檀憑之

魏詠之

第五十六卷

張軌

子寔 寔弟茂 寔子駿 靈弟玄靚 靚叔天錫

駿子重華 華子耀靈 靈父伯祚

第五十七卷

涼武昭王李玄盛

子士業

第五十八卷

孝友傳

李密

盛彥

夏方

王裒

許攸

庾袞

孫晷

顏含

劉殷

王延

王談

桑虞

何琦

吳達

第五十九卷

忠義傳

嵇紹

從子含

王豹

劉沉

麴允

焦嵩

賈渾

王育

韋忠

辛勉

劉敏元

周該

栢雄

韓階

周崎

易雄

樂道融

虞悝

沈勁

吉挹

王諒

宋矩

車濟

丁穆

辛恭靖

羅企生

張禕

第六十卷

良吏傳

魯芝

胡威

杜軫

竇允

王宏

曹攄

潘京

范晔

丁紹

喬智明

鄧攸

吳隱之

第六十一卷

儒林傳

范平

文立

陳邵

虞喜

劉兆

汜毓

徐苗

崔遊

范隆

杜夷

董景道

續咸

徐邈

孔衍

范宣

韋謏

范弘之

王歡

第六十二卷

文苑傳

應貞

成公綏

左思

趙至

鄒湛

棗據

褚陶

王沉

張翰

庾闡

曹毗

李充

袁宏

伏滔

羅含

顧愷之

郭澄之

第六十三卷

十九

外戚傳

羊秀

王恂 弟虔愷

楊文宗

羊玄之

虞豫 子胤

庾琛

杜乂

褚裒

何準 子澄

王濛 子修

王遐

王蘊

褚爽

第六十四卷

隱逸傳

孫登

董京

夏統

朱冲

范粲 子喬

魯勝

董養

霍原

郭琦

伍朝

魯褒

汜騰

任旭

郭文

龔壯

孟陋

韓績

譙秀

翟湯

子莊

郭翻

辛謚

劉麟之

索襲

楊軻

公孫鳳

公孫永

張忠

石垣

宋纒

郭荷

郭瑀

祁嘉

瞿硎先生

謝敷

戴逵

龔玄之

陶淡

陶潛

第六十五卷

藝術傳

陳訓

戴洋

韓友

淳于智

步熊

杜不愆

嚴卿

隗炤

卜珮

鮑靚

吳猛

幸靈

佛圖澄

麻襦

單道開

黃泓

索統

孟欽

王嘉

僧涉

郭磨

鳩摩羅什

雲霍

臺產

第六十六卷

二十

列女傳

羊耽妻辛氏

杜有道妻嚴氏

王渾妻鍾氏

鄭袤妻曹氏

愍懷太子妃王氏

鄭休妻石氏

陶侃母湛氏

賈渾妻宗氏

梁緯妻辛氏

許延妻杜氏

虞潭母孫氏

周顛母李氏

張茂妻陸氏

尹虞二女

荀崧小女灌

王凝之妻謝氏

劉臻妻陳氏

皮京妻龍氏

孟昶妻周氏

何無忌母劉氏

劉聰妻劉氏

王廣女

陝婦人

靳康女

韋逞母宋氏

張天錫二妾閭氏薛氏

苻堅妾張氏

竇滔妻蘇氏

苻登妻毛氏

慕容垂妻段氏

段豐妻慕容氏

呂纂妻楊氏

呂紹妻張氏

李玄盛后尹氏

第六十七卷

四夷傳

東夷

夫餘 馬韓 辰韓 肅慎 倭人 禪離等十國

西夷

吐谷渾 馬耆 龜茲 大宛 康居 大秦

晉書目錄

南蠻 林邑 扶南

北狄 匈奴

第六十八卷

王敦 沈充

桓溫 孟嘉

第六十九卷

桓玄

卞範之

殷仲文

第七十卷

王彌

張昌

陳敏

王如

杜曾

杜弢

王機

祖約

蘇峻

孫恩

盧循

譙縱

載記

十一

第一卷 前趙

劉元海 子和 劉宣

第二卷 前趙

劉聰 子粲 陳元達

第三卷 前趙

劉曜

第四卷 後趙

石勒上

第五卷 後趙

石勒下 子弘 張賓

第六卷

後趙

石季龍上

第七卷

後趙

石季龍下

子世 遵 鑒 冉閔

第八卷

前燕

慕容廆

裴嶷 高瞻

第九卷

前燕

慕容皝

慕容翰 陽裕

第十卷

前燕

慕容儁

韓恒 李產 產子績

第十一卷

前燕

慕容暉

慕容恪 陽鶩 皇甫真

第十二卷

前秦

苻洪

苻健

苻生

苻雄 王墮

第十三卷

前秦

苻堅上

第十四卷

前秦

苻堅下

王猛 苻融 苻朗

第十五卷

前秦

苻丕

苻登

索汙 徐嵩

第十六卷

後秦

姚弋仲

姚襄

姚萇

第十七卷 後秦

姚興上

第十八卷 後秦

姚興下 尹緯

第十九卷 後秦

姚弘

第二十卷 後蜀

李特

李流 李庠

第二十一卷 後蜀

李雄

李班

李期

李壽

李勢

第二十二卷 後涼

呂光

呂纂

呂隆

十四 大尾

第二十三卷 後燕

慕容垂

第二十四卷 後燕

慕容寶

慕容盛

慕容熙

慕容雲

第二十五卷 西秦 北燕

乞伏國仁

乞伏乾歸

乞伏熾磐

馮跋 馮素始

第二十六卷 南涼

乞伏熾磐

秃髮烏孤

秃髮利鹿孤

秃髮儁檀

第二十七卷 南燕

慕容德

第二十八卷 南燕

慕容超

第二十九卷 北凉

沮渠蒙遜

第三十卷 夏

赫連勃勃

右晉十二世十五帝一百五十六年

中朝四帝都洛陽五十四年

江左十一帝都建康一百二年

有五凉四燕三秦二趙夏蜀十六國附其書

起乙酉盡庚申

晉書一

帝紀第一

宣帝

宣皇帝諱懿字仲達河內溫縣孝敬里人姓司馬氏其先出自帝
 高陽之子重黎為夏官祝融歷唐虞夏商世序其職及周以夏官
 為司馬其後程伯休父周宣王時以世官克平徐方錫以官族因
 而為氏楚漢間司馬卬為趙將與諸侯伐秦秦亡立為殷王都河
 內漢以其地為郡子孫遂家焉自卬八世生征西將軍鈞字叔平
 鈞生豫章太守量字公度量生潁川太守雋字元異雋生京兆尹
 防字建公帝即防之第二子也少有奇節聰朗多大略博學洽聞
 伏膺儒教漢末大亂常慨然有憂天下心南郡太守同郡楊俊名
 知人見帝未弱冠以為非常之器尚書清河崔琰與帝兄朗善亦

魏書卷之四

魏書卷之四

謂朗曰君弟聰亮明允剛斷英特非子所及也漢建安六年郡舉上計掾魏武帝爲司空聞而辟之帝知漢運方微不欲屈節曹氏辭以風痺不能起居魏武使人夜往密刺之帝堅臥不動及魏武爲丞相又辟爲文學掾勅行者曰若復盤桓便收之帝懼而就職於是使與太子游處遷黃門侍郎轉議郎丞相東曹屬尋轉主簿從討張魯言於魏武曰劉備以詐力虜劉璋蜀人未附而遠爭江陵此機不可失也今若曜威漢中益州震動進兵臨之勢必瓦解因此之勢易爲功力聖人不能違時亦不失時矣魏武曰人苦無足旣得隴右復欲得蜀言竟不從旣而從討孫權破之軍還權遣使乞降上表稱臣陳說天命魏武帝曰此兒欲踞吾著爐炭上邪答曰漢運垂終殿下十分天下而有其九以服事之權之稱臣天人之意也虞夏殷周不以謙讓者畏天知命也

魏國旣建遷太子中庶子每與大謀輒有奇策爲太子所信重與陳群吳質朱鑠號曰四友遷爲軍司馬言於魏武曰昔箕子陳謀以食爲首今天下不耕者蓋二十餘萬非經國遠籌也雖戎甲未卷自宜且耕且守魏武納之於是務農積穀國用豐贍帝又言荆州刺史胡脩龔暴南鄉太守傅方驕奢竝不可居邊魏武不之察及蜀將關羽圍曹仁於樊于禁等七軍皆沒脩方果降羽而仁圍甚急焉是時漢帝都許昌魏武以爲近賊欲徙河北帝諫曰禁等爲水所沒非戰守之所失於國家大計未有所損而便遷都旣示敵以弱又淮沔之人大不安矣孫權劉備外親內疎羽之得意權所不願也可喻權所令倚其後則樊圍自解魏武從之權果遣將呂蒙西襲公安拔之羽遂爲蒙所獲魏武以荆州遺黎及屯田在潁川者逼近南寇皆欲徙之帝曰荆楚輕脫易動難安關羽新破

諸爲惡者藏竄觀望今徙其善者旣傷其意將令去者不敢復還從之其後諸亡者悉復業及魏武薨于洛陽朝野危懼帝綱紀喪事內外肅然乃奉梓宮還鄴

魏文帝卽位封河津亭侯轉丞相長史會孫權帥兵西過朝議以樊襄陽無穀不可以禦寇時曹仁鎮襄陽請召仁還宛帝曰孫權新破關羽此其欲自結之時也必不敢爲患襄陽水陸之衝禦寇要害不可棄也言竟不從仁遂焚棄二城權果不爲寇魏文悔之及魏受漢禪以帝爲尚書頃之轉督軍御史中丞封安國鄉侯黃初二年督軍官罷遷侍中尚書右僕射

五年天子南巡觀兵吳疆帝留鎮武昌改封向鄉侯轉撫軍假節領兵五千加給事中錄尚書事帝固辭天子曰吾於庶事以夜繼晝無須臾寧息此非以爲榮乃分憂耳

六年天子復大興舟師征吳復命帝居守內鎮百姓外供軍資臨行詔曰吾深以後事爲念故以委卿曹參雖有戰功而蕭何爲重使吾無西顧之憂不亦可乎天子自廣陵還洛陽詔帝曰吾東撫軍當總西事吾西撫軍當總東事於是帝留鎮許昌及天子疾篤帝與曹真陳群等見於崇華殿之南堂竝受顧命輔政詔太子曰有間此三公者慎勿疑之明帝卽位改封舞陽侯及孫權圍江夏遣其將諸葛瑾張霸并攻襄陽帝督諸軍討權走之進擊敗瑾斬霸并首級千餘遷驃騎將軍

太和元年六月天子詔帝屯于宛加督荆豫二州諸軍事初蜀將孟達之降也魏朝遇之甚厚帝以達言行傾巧不可任驟諫不見聽乃以達領新城太守封侯假節達於是連吳固蜀潛圖中國蜀相諸葛亮惡其反覆又慮其爲患達與魏興太守申儀有隙亮欲

促其事乃遣郭模詐降過儀因漏泄其謀達聞其謀漏泄將舉兵帝恐達速發以書喻之曰將軍昔棄劉備託身國家國家委將軍以疆場之任任將軍以圖蜀之事可謂心貫白日蜀人愚智莫不切齒於將軍諸葛亮欲相破惟苦無路耳模之所言非小事也亮豈輕之而令宣露此殆易知耳達得書大喜猶與不決帝乃潛軍進討諸將言達與二賊交構宜觀望而後動帝曰達無信義此其相疑之時也當及其未定促決之乃倍道兼行八日到其城下吳蜀各遣其將向西城安橋木關塞以救達帝分諸將以距之初達與亮書曰宛去洛八百里去吾一千二百里聞吾舉事當表上天子比相反覆一月間也則吾城已固諸軍足辦則吾所在深險司馬公必不自來諸將來吾無患矣及兵到達又告亮曰吾舉事八日而兵至城下何其神速也上庸城三面阻水達於城外爲木柵

以自固帝渡水破其柵直造城下八道攻之旬有六日達甥鄧賢將李輔等開門出降斬達首傳京師俘獲萬餘人振旅還于宛乃勸農桑禁浮費南土悅附焉初申儀久在魏興專威疆場輒承制刻印多所假授達既誅有自疑心時諸郡守以帝新克捷奉禮求賀皆聽之帝使人諷儀儀至問承制狀執之歸于京師又徙孟達餘衆七千餘家於幽州蜀將姚靜鄭他等帥其屬七千餘人來降時邊郡新附多無戶名魏朝欲加隱實屬帝朝於京師天子訪之於帝帝對曰賊以密網束下故下棄之宜弘以大綱則自然安樂又問二虜宜討何者爲先對曰吳以中國不習水戰故敢散居東關凡攻敵必扼其喉而椿其心夏口東關賊之心喉若爲陸軍以向皖城引權東下爲水戰軍向夏口乘其虛而擊之此神兵從天而墜破之必矣天子竝然之復命帝屯於宛

四年遷大將軍加大都督假黃鉞與曹真伐蜀帝自西城斫山開道水陸竝進一本作次進沔而上至於朐腮拔其新豐縣軍次丹口遇兩班師明年諸葛亮寇天水圍將軍賈嗣魏平於祁山天子曰西方有事非君莫可付者乃使帝西屯長安都督雍梁二州諸軍事統車騎將軍張郃後將軍費曜征蜀護軍戴凌雍州刺史郭淮等討亮張郃勸帝分軍住雍郃爲後鎮帝曰料前軍獨能當之者將軍言是也若不能當而分爲前後此楚之三軍所以爲黥布禽也遂進軍淪麋亮聞大軍且至乃自帥衆將芟上邽之麥諸將皆懼帝曰亮慮多決少必安營自固然後芟麥吾得二日兼行足矣於是卷甲晨夜赴之亮望塵而遁帝曰吾倍道疲勞此曉兵者之所貪也亮不敢據渭水此易與耳進次陽與亮相遇帝列陣以待之使將牛金輕騎餌之兵才接而亮退迨至祁山亮屯鹵城據南

北二山斷水爲重圍帝攻拔其圍亮宵遁追擊破之俘斬萬計天子使使者勞軍增封邑時軍師杜襲督軍薛悌皆言明年麥熟亮必爲寇隴右無穀宜及冬豫運帝曰亮再出祁山一攻陳倉挫衄而反縱其後出不復攻城當求野戰必在隴東不在西也亮每以糧少爲恨歸必積穀以吾料之非三稔不能動矣於是表徙冀州農夫佃上邽興京兆天水南安監冶

青龍元年穿成國渠築臨晉陂溉田數千頃國以充實焉

二年亮又率衆十餘萬出斜谷壘于郿之渭水南原天子憂之遣征蜀護軍秦朗督步騎二萬受帝節度諸將欲住渭北以待之帝曰百姓積聚皆在渭南此必爭之地也遂引軍而濟背水爲壘因謂諸將曰亮若勇者當出武功依山而東若西上五丈原則諸軍無事矣亮果上原將北渡渭帝遣將軍周當屯陽遂以餌之數日

亮不動帝曰亮欲爭原而不向陽遂此意可知也遣將軍胡遵雍州刺史郭淮共備陽遂與亮會于積石臨原而戰亮不得進還於五丈原會有長星墜亮之壘帝知其必敗遣奇兵犄亮之後斬五百餘級獲生口千餘降者六百餘人時朝廷以亮僞軍遠寇利在急戰每命帝持重以候其變亮數挑戰帝不出因遣帝巾幘婦人之飾帝怒表請決戰天子不許乃遣骨鯁臣衛尉辛毗杖節爲軍師以制之後亮復來挑戰帝將出兵以應之毗杖節立軍門帝乃止初蜀將姜維聞毗來謂亮曰辛毗杖節而至賊不復出矣亮曰彼本無戰心所以固請者以示武于其衆耳將在軍君命有所不受苟能制吾豈千里而請戰邪帝弟孚書問軍事帝復書曰亮志大而不見機多謀而少決好兵而無權雖提卒十萬已墮吾畫中破之必矣與之對壘百餘日會亮病卒諸將燒營遁走百姓奔告

帝出兵追之亮長史楊儀反旗鳴鼓若將距帝者帝以窮寇不之逼於是楊儀結陣而去經日乃行其營壘觀其遺事獲其圖書糧穀甚衆帝審其必死曰天下奇才也辛毗以爲尚未可知帝曰軍家所重軍書密計兵馬糧穀今皆棄之豈有人捐其五藏而可以生乎宜急追之關中多蒺藜帝使軍士二千人著軟材平底木屐前行蒺藜悉著屐一本作置服然後馬步俱進追到赤岸乃知亮死審問時百姓爲之諺曰死諸葛走生仲達帝聞而笑曰吾便料生不便料死故也先是亮使至帝問曰諸葛公起居何如食可幾米對曰三四升次問政事曰二十罰已上皆自省覽帝旣而告人曰諸葛孔明其能久乎竟如其言亮部將楊儀魏延爭權儀斬延并其衆帝欲乘隙而進有詔不許

三年遷太尉累增封邑蜀將馬岱入寇帝遣將軍牛金擊走之斬

千餘級武都氏王苻雙強端帥其屬六千餘人來降關東饑帝運
長安粟五百萬斛於京師

四年獲白鹿獻之天子曰昔周公旦輔成王有素雉之貢今君受
陝西之任有白鹿之獻豈非忠誠協苻千載同契俾乂邦家以永
厥休邪及遼東太守公孫文懿反徵帝詣京師天子曰此不足以
勞軍事欲必克故以相煩耳君度其作何計對曰棄城預走上計
也據遼水以距大軍次計也坐守襄平此成擒耳天子曰其計將
安出對曰惟明者能深度彼已豫有所棄此非其所及也今懸軍
遠征將謂不能持久必先距遼水而後守此中下計也天子曰往
還幾時對曰往百日還百日攻百日以六十日爲休息一年足矣
是時大修宮室加之以軍旅百姓饑弊帝將卽戎乃諫曰昔周公
營洛邑蕭何造未央今宮室未備臣之責也然自河以北百姓困

窮外內有役勢不竝興宜假絕內務以救時急

景初二年帥牛金胡遵等步騎四萬發自京都車駕送出西明門
詔弟孚子師送過溫賜以穀帛牛酒勅郡守典農以下皆往會焉
見父老故舊讌飲累日帝歎息悵然有感爲歌曰天地開闢日月
重光遭遇際會畢力遐方將埽群穢還過故鄉肅清萬里總齊八
荒告成歸老待罪舞陽遂進師經孤竹越碣石次于遼水文懿果
遣步騎數萬阻遼隧堅壁而守南北六七十里以距帝帝盛兵多
張旗幟出其南賊盡銳赴之乃泛舟潛濟以出其北與賊營相逼
沉舟焚梁傍遼水作長圍棄賊而向襄平諸將言曰不攻賊而作
圍非所以示衆也帝曰賊堅營高壘欲以老吾兵也攻之正入其
計此王邑所以恥過昆陽也古人曰敵雖高壘不得不與我戰者
攻其所必救也賊大衆在此則巢窟虛矣我直指襄平則人懷內

懼懼而求戰破之必矣遂整陣而過賊見兵出其後果邀之帝謂諸將曰所以不攻其營正欲致此不可失也乃縱兵逆擊大破之三戰皆捷賊保襄平進軍圍之初文懿聞魏師之出也請救於孫權權亦出兵遙爲之聲援遺文懿書曰司馬公善用兵變化若神所向無前深爲弟憂之會霖潦大水平地數尺三軍恐欲移營帝令軍中敢有言徙者斬都督令史張靜犯令斬之軍中乃定賊恃水樵牧自若諸將欲取之皆不聽司馬陳珪曰昔攻上庸八部竝進晝夜不息故能旬之半拔堅城斬孟達今者遠來而更安緩愚竊惑焉帝曰孟達衆少而食支一年將士四倍于達而糧不淹月以一月圖一年安可不速以四擊一正令半解猶當爲之是以不計死傷與糧競也今賊衆我寡賊飢我飽水雨乃爾功力不設雖當促之亦何所爲自發京師不憂賊攻但恐賊走今賊糧垂盡

而圍落未合掠其牛馬抄其樵采此故驅之走也夫兵者詭道善因事變賊憑衆恃雨故雖飢困未肯束手當示無能以安之取小利以驚之非計也朝廷聞師遇雨咸請召還天子曰司馬公臨危制變計日擒之矣旣而雨止遂合圍起土山地道楯櫓鉤撞發矢石雨下晝夜攻之時有長星色白有芒鬣自襄平城西南流于東北墜於梁水城中震懼文懿大懼乃使其所署相國王建御史大夫柳甫乞降請解圍面縛不許執建等皆斬之檄告文懿曰昔楚鄭列國而鄭伯猶肉袒牽羊而迎之孤爲王人位則上公而建等欲孤解圍退舍豈楚鄭之謂邪二人老耄必傳言失旨已相爲斬之若意有未已可更遣年少有明決者來文懿復遣侍中衛演乞尅日送任帝謂演曰軍事大要有五能戰當戰不能戰當守不能守當走餘二事惟有降與死耳汝不肯面縛此爲決就死也不須

送任文懿攻南圍突出帝縱兵擊敗之斬于梁水之上星墜之所
既入城立兩標以別新舊焉男子年十五已上七千餘人皆殺之
以爲京觀僞公卿已下皆伏誅戮其將軍畢盛等二千餘人收戶
四萬口三十餘萬初文懿篡其叔父恭位而囚之及將反將軍綸
直賈範等苦諫文懿皆殺之帝乃釋恭之囚封直等之墓顯其遺
嗣令曰古之伐國誅其鯨鯢而已諸爲文懿所誣誤者皆原之中
國人欲還舊鄉恣聽之時有兵士寒凍乞襦帝弗之與或曰幸多
故襦可以賜之帝曰襦者官物人臣無私施也乃奏軍人年六十
已上者罷遣千餘人將吏從軍死亡者致喪還家遂班師天子遣
使者勞軍于薊增封食昆陽并前二縣初帝至襄平夢天子枕其
膝曰視吾面俛視有異於常心惡之先是詔帝便道鎮關中及次
白屋有詔召帝三日之間詔書五至手詔曰間側息望到到便直

排閣入視吾面帝大遽乃乘追鋒車晝夜兼行自白屋四百餘里
一宿而至引入嘉福殿臥內升御床帝流涕問疾天子執帝手目
齊王曰以後事相託死乃復可忍吾忍死待君得相見無所復恨
矣與大將軍曹爽並受遺詔輔少主及齊王卽帝位遷侍中持節
都督中外諸軍錄尚書事與爽各統兵三千人共執朝政更直殿
中乘輿入殿爽欲使尚書奏事先由已乃言於天子徙帝爲大司
馬朝議以爲前後大司馬累薨於位乃以帝爲太傅入殿不趨贊
拜不名劔履上殿如漢蕭何故事嫁娶喪葬取給於官以世子師
爲散騎常侍子弟三人爲列侯四人爲騎都尉帝固讓子弟官不
受

魏正始元年春正月東倭重譯納貢焉耆危須諸國弱水以南鮮
卑名王皆遣使來獻天子歸美宰輔又增帝封邑初魏明帝好修

宮室制度靡麗百姓苦之帝自遼東還役者猶萬餘人雕玩之物動以千計至是皆奏罷之節用務農天下欣賴焉

二年夏五月吳將全琮寇芍陂朱然孫倫圍樊城諸葛瑾步騭抄相中帝請自討之議者咸言賊遠來圍樊不可卒拔挫於堅城之下有自破之勢宜長策以御之帝曰邊城受敵而坐廟堂疆場騷動衆心疑惑是社稷之大憂也六月乃督諸軍南征車駕送出津陽門帝以南方暑溼不宜持久使輕騎挑之然不敢動於是休戰士簡精銳募先登申號令示必攻之勢吳軍夜遁走追至三州口斬獲萬餘人收其舟船軍資而還天子遣侍中常侍勞軍于宛秋七月增封食鄜臨潁并前四縣邑萬戶子弟十一人皆爲列侯帝勳德日盛而謙恭愈甚以太常常林鄉邑舊齒見之每拜恒戒子弟曰盛滿者道家之所忌四時猶有推移吾何德以堪之損之

又損之庶可以免乎

三年春天子追封諡皇考京兆尹爲舞陽成侯三月奏穿廣漕渠引河入汴溉東南諸陂始大佃於淮北先是吳遣將諸葛恪屯皖邊鄙苦之帝欲自擊恪議者多以賊據堅城積穀欲引致官兵今懸軍遠攻其救必至進退不易未見其便帝曰賊之所長者水也今攻其城以觀其變若用其所長棄城奔走此爲廟勝也若敢固守湖水冬淺船不得行勢必棄水相救由其所短亦吾利也

四年秋九月帝督諸軍擊諸葛恪車駕送出津陽門軍次於舒恪焚燒積聚棄城而遁帝以滅賊之要在於積穀乃大興屯守廣開淮陽百尺二渠又修諸陂於潁之南北萬餘頃自是淮北倉庾相望壽陽至於京師農官屯兵連屬焉

五年春正月帝至自淮南天子使持節勞軍尚書鄧颺李勝等欲

令曹爽建立功名勸使伐蜀帝止之不可爽果無功而還
六年秋八月曹爽毀中壘中堅營以兵屬其弟中領軍羲帝以先
帝舊制禁之不可冬十二月天子詔帝朝會乘輿升殿
七年春正月吳寇柵中夷夏萬餘家避寇北渡沔帝以沔南近賊
若百姓奔還必復致寇宜權留之曹爽曰今不能修守沔南而留
百姓非長策也帝曰不然凡物致之安地則安危地則危故兵書
曰成敗形也安危勢也形勢御衆之要不可以不審設令賊以二
萬人斷沔水三萬人與沔南諸軍相持萬人陸梁柵中將何以救
之爽不從卒令還南賊果襲破柵中所失萬計
八年夏四月夫人張氏薨曹爽用何晏鄧颺丁謐之謀遷太后於
永寧宮專擅朝政兄弟竝典禁兵多樹親黨屢改制度帝不能禁
於是與爽有隙五月帝稱疾不與政事時人爲之謠曰何鄧丁亂

京城

九年春三月黃門張當私出掖庭才人石英等十一人與曹爽爲
伎人爽晏謂帝疾篤遂有無君之心與當密謀圖危社稷期有日
矣帝亦潛爲之備爽之徒屬亦頗疑帝會河南尹李勝將蒞荊州
來候帝帝詐疾篤使兩婢侍持衣衣落指口言渴婢進粥帝不持
杯飲粥皆流出霑胸勝曰衆情謂明公舊風發動何意尊體乃爾
帝使聲氣纔屬說年老枕疾死在旦夕君當屈并州并州近胡善
爲之備恐不復相見以子師昭兄弟爲託勝曰當還忝本州非并
州帝乃錯亂其辭曰君方到并州勝復曰當忝荊州帝曰年老意
荒不解君言今還爲本州盛德壯烈好建功勳勝退告爽曰司馬
公尸居餘氣形神已離不足慮矣他日又言曰太傅不可復濟令
人愴然故爽等不復設備

嘉平元年春正月甲午天子謁高平陵爽兄弟皆從是日太白襲
月帝于是奏永寧太后廢爽兄弟時景弟爲中護軍將兵屯司馬
門帝列陣闕下經爽門爽帳下督嚴世上樓引弩將射帝孫謙止
之曰事未可知三注三止皆引其肘不得發大司農桓範出赴爽
蔣濟言於帝曰智囊往矣帝曰爽與範內疎而智不及驚馬戀短
豆必不能用也於是假司徒高柔節行大將軍事領爽營謂柔曰
君爲周勃矣命太僕王觀行中領軍攝義營帝親帥太尉蔣濟等
勒兵出迎天子屯于洛水浮橋上奏曰先帝詔陛下秦王及臣升
於御床握臣臂曰深以後事爲念今大將軍爽背棄顧命敗亂國
典內則僭擬外專威權群官要職皆置所親宿衛舊人竝皆斥黜
根據槃牙縱恣日甚又以黃門張當爲都監專共交關伺候神器
天下洵洵人懷危懼陛下便爲寄坐豈得久安此非先帝詔陛下

及臣升御床之本意也臣雖朽邁敢忘前言昔趙高極意秦是以
亡呂霍早斷漢祚永延此乃陛下之殷鑒臣授命之秋也公卿群
臣皆以爽有無君之心兄弟不宜典兵宿衛奏皇太后皇太后勅
如奏施行臣輒勅王者及黃門令罷爽義訓吏兵各以本官侯就
第若稽留車駕以軍法從事臣輒力疾將兵詣洛水浮橋伺察非
常爽不通奏留車駕宿伊水南伐樹爲鹿角發屯兵數千人以守
桓範果勸天子幸許昌移檄徵天下兵爽不能用而夜遣侍
中許允尚書陳泰詣帝觀望風旨帝數其過失事止免官泰還以
報爽勸之通奏帝又遣爽所信殿中校尉尹大目諭爽指洛水爲
誓爽意信之桓範等援引古今諫說萬端終不能從乃曰司馬公
正當欲奪吾權耳吾得以侯還第不失爲富家翁範拊膺曰坐卿
滅吾族矣遂通帝奏既而有司劾黃門張當并發爽與何晏等反

事乃收爽兄弟及其黨與何晏丁謐鄧颺畢軌李勝桓範等誅之
蔣濟曰曹真之勳不可以不祀帝不聽初爽司馬魯芝主簿楊綜
斬關奔爽及爽之將歸罪也芝綜泣諫曰公居伊周之任挾天子
杖天威孰敢不從舍此而欲就東市豈不痛哉有司奏收芝綜科
罪帝赦之曰以勸事君者二月天子以帝爲丞相增封潁川之繁
昌鄆陵新汲父城并前八縣邑二萬戶奏事不名固讓丞相冬十
二月加九錫之禮朝會不拜固讓九錫

二年春正月天子命帝立廟于洛陽置左右長史增掾屬舍人滿
十人歲舉掾屬任御史秀才各一人增官騎百人鼓吹十四人封
子彤平樂亭侯倫安樂亭侯帝以久疾不任朝請每有大事天子
親幸第以諮訪焉兗州刺史令狐愚太尉王凌貳於帝謀立楚王
彪

三年春正月王凌詐言吳人塞涂水請發兵以討之帝潛知其計
不聽夏四月帝白帥中軍汎舟沿流九日而到甘城凌計無所出
乃迎於武丘面縛水次曰凌若有罪公當折簡召凌何苦自來邪
帝曰以君非折簡之客故耳卽以凌歸于京師道經賈逵廟凌呼
曰賈梁道王凌是大魏之忠臣惟爾有神知之至項仰鵠而死收
其餘黨皆夷三族并殺彪悉錄魏諸王公置于鄴命有司監察不
得交關天子遣侍中韋誕持節勞軍于五池帝至自甘城天子又
使兼大鴻臚大僕庾嶷持節策命帝爲相國封安平郡公孫及兄
子各一人爲列侯前後食邑五萬戶侯者十九人固讓相國郡公
不受六月帝寢疾夢賈逵王凌爲祟甚惡之秋八月戊寅崩於京
師時年七十三天子素服臨弔喪葬威儀依漢霍光故事追贈相
國郡公弟孚表陳先志辭郡公及輜輶車九月庚申葬于河陰諡

曰文貞後改諡文宣先是預作終制於首陽山爲土藏不墳不樹作顧命三篇斂以時服不設明器後終者不得合葬一如遺命晉國初建追尊曰宣王武帝受禪上尊號曰宣皇帝陵曰高原廟稱高祖帝內忌而外寬猜忌多權變魏武察帝有雄豪志聞有狼顧相欲驗之乃召使前行令反顧面正向後而身不動又嘗夢三馬同食一槽甚惡焉因謂太子丕曰司馬懿非人臣也必預汝家事太子素與帝善每相全佑故免帝於是勤於吏職夜以忘寢至於芻牧之間悉皆臨履由是魏武意遂安及平公孫文懿太行殺戮誅曹爽之際支黨皆夷及三族男女無少長姑姊妹女子之適人者皆殺之既而竟遷魏鼎云明帝時王導侍坐帝問前世所以得天下導乃陳帝創業之始及文帝末高貴鄉公事明帝以面覆牀曰若如公言晉祚復安得長遠迹其猜忍蓋有符於狼顧也

制曰夫天地之大黎元爲本邦國之貴元首爲先治亂無常興亡有運是故五帝之上居萬乘以爲憂三王已來處其憂而爲樂競智力爭利害大小相吞強弱相襲逮乎魏室三方鼎峙干戈不息氣霧交飛宣皇以天挺之姿應期佐命文以纘治武以稜威用人如在已求賢若不及情深阻而莫測性寬綽而能容和光同塵與時舒卷戢鱗潛翼思屬風雲飾忠于已詐之心延安于將危之命觀其雄畧內斷英猷外決殄公孫於百日擒孟達於盈旬自以兵動若神謀無再計矣既而擁衆西舉與諸葛相持抑其甲兵本無鬪志遺其中輟方發憤心杖節當門雄圖頓屈請戰千里詐欲示威且秦蜀之人勇懦非敵夷險之路勞逸不同以此爭功其利可見而返閉軍固壘莫敢爭鋒生怯實而未前死疑虛而猶遁良將之道失在斯乎文帝之世輔翼權重許昌同蕭何之委崇華甚霍

光之寄當謂竭誠盡節伊傳可齊及明帝將終棟梁是屬受遺二
主佐命三朝既承忍死之託曾無殉生之報天子在外內起甲兵
陵土未乾遽相誅戮貞臣之體寧若此乎盡善之方以斯為惑夫
征討之策豈東智而西愚輔佐之心何前忠而後亂故晉明掩面
恥欺偽以成功石勒肆言笑奸回以定業古人有云積善三年知
之者少為惡一日聞于天下可不謂然乎雖自隱過當年而終見
嗤後代亦猶竊鍾掩耳以眾人為不聞銳意盜金謂市中為莫覩
故知貪于近者則遺遠溺于利者則傷名若不損己以益人則當
禍人而福己順理而舉易為力背時而動難為功況以未成之晉
基逼有餘之魏祚雖復道格區宇德被蒼生而天未啓時寶位猶
阻非可以智競不可以力爭雖則慶流後昆而終身於北面矣

晉書一 帝紀第一

晉書一 帝紀第一

晉書一

帝紀第二

晉書一 帝紀第一

景帝

景皇帝諱師字子元宣帝長子也雅有風彩沉毅多大略少流美
譽與夏侯玄何晏齊名晏常稱曰惟幾也能成天下之務司馬子
元是也魏景初中拜散騎常侍累遷中護軍為選用之法舉不越
功吏無私焉宣穆皇后崩居喪以至孝聞宣帝之將誅曹爽深謀
祕策獨與帝潛畫文帝弗之知也將發夕乃告之既而使人覘之
帝寢如常而文帝不能安席晨會兵司馬門鎮靜內外置陣甚整
宣帝曰此子竟可也初帝陰養死士三千散在人間至是一朝而
集眾莫知所出也事平以功封長平鄉侯食邑千戶尋加衛將軍
及宣帝薨議者咸云伊尹既卒伊陟嗣事天子命帝以撫軍大將

軍輔政

魏嘉平四年春正月遷大將軍加侍中持節都督中外諸軍錄尚書事命百官舉賢才明少長卹窮獨理廢滯諸葛誕母丘儉王昶陳泰胡遵都督四方王基州泰鄧艾石苞典州郡盧毓李豐掌選舉傅嘏虞松叅計謀鍾會夏侯玄王肅陳本孟康趙鄴張緝預朝議四海傾注朝野肅然或有請改易制度者帝曰不識不知順帝之則詩人之美也三祖典制所宜遵奉自非軍事不得妄有改革五年夏五月吳太傅諸葛恪圍新城朝議慮其分兵以寇淮泗一作西欲戍諸水口帝曰諸葛恪新得政於吳欲徼一時之利并兵合肥以冀萬一不暇復爲青徐患也且水口非一多戍則用兵衆少戍則不足以禦寇恪果并力合肥卒如所度帝於是使鎮東將軍母丘儉揚州刺史文欽等距之儉欽請戰帝曰恪卷甲深入投兵死

地其鋒未易當且新城小而固攻之未可拔遂命諸將高壘以弊之相持數月恪攻城力屈死傷太半帝乃勅欽督銳卒趨合榆要其歸路儉帥諸將以爲後繼恪懼而遁欽逆擊大破之斬首萬餘級

正元元年春正月天子與中書令李豐后父光祿大夫張緝黃門監蘇鑠永寧署令樂敦宓從僕射劉寶賢等謀以太常夏侯玄代帝輔政帝密知之使舍人王羨以車迎豐豐見迫隨羨而至帝數之豐知禍及因肆惡言帝怒遣勇士以刀鑲築殺之逮捕玄緝等皆夷三族三月乃諷天子廢皇后張氏因下詔曰姦臣李豐等靖一作潛譖庸回陰搆凶慝大將軍糾虔天刑致之誅辟周勃之克呂氏霍光之擒上官曷以過之其增邑九千戶并前四萬帝讓不受天子以玄緝之誅深不自安而帝亦慮難作潛謀廢立乃密諷魏永

寧太后秋九月甲戌太后下令曰皇帝春秋已長不親萬機耽淫
內寵沈嫚女德日近倡優縱其醜虐迎六宮家人畱止內房毀人
倫之敘亂男女之節又爲羣小所迫將危社稷不可承奉宗廟帝
召羣臣會議流涕曰太后令如是諸君其如王室何咸曰伊尹放
太甲以寧殷霍光廢昌邑以安漢權定社稷以清四海二代之行
於古明公當之於今今日之事惟命是從帝曰諸君見望者重安
敢避之乃與羣公卿士共奏太后曰臣聞天子者所以濟育羣生
永安萬國皇帝春秋已長未親萬機日使小優郭懷袁信等裸袒
淫戲又於廣望觀下作遼東妖婦道路行人莫不掩目清商令令
狐景諫帝帝燒鐵灸之太后遭合陽君喪帝嬉樂自若清商丞龐
熙諫帝帝弗一作勿聽太后還北宮殺張美人帝甚恚望熙諫帝怒復
以彈彈熙每文書入帝不省視太后令帝在式乾殿講學帝又不

從不可以承天序臣請依漢霍光故事收皇帝璽綬以齊王歸藩
奏可於是有司以太牢策告宗廟王就乘輿副車羣臣從至西掖
門帝泣曰先臣受歷世殊遇先帝臨崩託以遺詔臣復忝重任不
能獻可替否羣公卿士遠惟舊典爲社稷深計寧負聖躬使宗廟
血食於是使使者持節衛送舍河內之重門誅郭懷袁信等是日
與羣臣議所立帝曰方今宇宙未清二虜爭衡四海之主惟在賢
哲彭城王據太祖之子以賢則仁聖明允以年則皇室之長天位
至重不得其才不足以寧濟六合乃與羣公奏太后太后以彭城
王先帝諸父於昭穆之序爲不次則烈祖之世永無承嗣東海定
王明帝之弟欲立其子高貴鄉公髦帝固爭不獲乃從太后令遣
使迎高貴鄉公於元城而立之改元曰正元天子受璽墮舉趾高
帝聞而憂之及將大會帝訓於天子曰夫聖王重始正本敬初古

人所慎也明當大會萬衆瞻穆穆之容公卿聽玉振之音詩云示人不佻是則是效易曰出其言善則千里之外應之雖禮儀周備猶宜加之以祗恪以副四海顛顛式仰癸巳天子詔曰朕聞創業之君必須股肱之臣守文之主亦賴匡佐之輔是故文武以呂召彰受命之功宣王倚山甫享中興之業大將軍世載明德應期作輔遭天降險帝室多難齊王蒞政不迪率典公履義執忠以寧區夏式是百辟總齊庶事內摧寇虐外靜姦宄日昃憂勤劬勞夙夜德聲光于上下勳烈施於四方深惟大議首建明策權定社稷援立朕躬宗廟獲安億兆慶賴伊摯之保又殷邦公旦之綏寧周室篋以尚焉朕甚嘉之夫德茂者位尊庸大者祿厚古今之通義也其登位相國增邑九千并前四萬戶進號大都督假黃鉞入朝不趨奏事不名劔履上殿賜錢五百萬帛五千匹以彰元勳帝固辭

相國又上書訓于天子曰荆山之璞雖美不琢不成其寶顏冉之才雖茂不學不弘其量仲尼有云予非生而知之者好古敏以求之者也仰觀黃軒五代之主莫不有所稟則顛頊受學於綠曷高辛問道於柏招逮至周成旦望作輔故能離經辯志安道樂業夫然故君道明於上兆庶順於下形措之隆實由於此宜遵先王下問之義使講誦之業屢聞於聽典謨之言日陳於側也時天子頗修華飾帝又諫曰履端初政宜崇玄樸竝敬納焉十一月有白氣經天

二年春正月有彗星見於吳楚之分西北竟天鎮東大將軍母丘儉揚州刺史文欽舉兵作亂矯太后令移檄郡國爲壇盟于西門之外各遣子四人質于吳以請救二月儉欽帥衆六萬渡淮而西帝會公卿謀征討計朝議多謂可遣諸將擊之王肅及尙書傅嘏

中書侍郎鍾會勸帝自行戊午帝統中軍步騎十餘萬以征之倍道兼行召三方兵大會于陳許之郊甲申次于滎橋儉將史招李續相次來降儉欽移入項城帝遣荊州刺史王基進據南頓以逼儉帝深壁高壘以待東軍之集諸將請進軍攻其城帝曰諸軍得其一未知其二淮南將士本無反志且儉欲蹈縱橫之迹習儀秦之說謂遠近必應而事起之日淮北不從史招李續前後瓦解內乖外叛自知必敗困獸思鬪速戰更合其志雖云必克傷人亦多且儉等欺誑將士詭變萬端小與持久詐情自露此不戰而克之也乃遣諸葛誕督豫州諸軍自安風向壽春征東將軍胡遵督青徐諸軍出譙宋之間絕其歸路帝屯汝陽遣兗州刺史鄧艾督太山諸軍進屯樂嘉示弱以誘之欽進軍將攻艾帝潛軍銜枚徑造樂嘉與欽相遇欽子鴛年十八勇冠三軍謂欽曰及其未定請

登城鼓譟擊之可破也既謀而行三譟而欽不能應鴛退相與引而東帝謂諸將曰欽走矣命發銳軍以追之諸將皆曰欽舊將鴛少而銳引軍內入未有失利必不走也帝曰一鼓作氣再而衰三而竭鴛三鼓欽不應其勢已屈不走何待欽將遁鴛曰不先折其勢不得去也乃與驍騎十餘摧鋒陷陣所向皆披靡遂引去帝遣左長史司馬璉督驍騎八千翼而追之使將軍樂綝等督步兵繼其後比至沙陽頻陷欽陣弩矢雨下欽蒙楯而馳大破其軍衆皆投戈而降欽父子與麾下走保項儉聞欽敗棄衆宵遁淮南安風津都尉追儉斬之傳首京都欽遂奔吳淮南平初帝目有瘤疾使醫割之鴛之來攻也驚而日出懼六軍之恐蒙之以被痛甚嚙被敗而左右莫知焉閏月疾篤使文帝總統諸軍辛亥崩于許昌時年四十八二月帝之喪至自許昌天子素服臨弔詔曰公有濟世

寧國之勳尅定禍亂之功重之以死王事宜加殊禮其令公卿議制有司議以爲忠安社稷功濟宇內宜依霍光故事追加大司馬之號以冠軍大將軍增邑五萬戶謚曰武公文帝表讓曰臣亡父不敢受丞相相國九命之禮亡兄不敢受相國之位誠以太祖常所階歷也今謚與二祖同必所祇懼昔蕭何張良霍光咸有匡佐之功何謚文終良謚文成光謚宣成必以文武爲謚請依何等就加詔許之謚曰忠武晉國旣建追尊曰景王武帝受禪上尊號曰景皇帝陵曰峻平廟稱世宗

文帝

文皇帝諱昭字子上景帝之母弟也魏景初二年封新城鄉侯正始初爲洛陽典農中郎將值魏明奢侈之後帝蠲除苛碎不奪農時百姓大悅轉散騎常侍大將軍曹爽之伐蜀也以帝爲征蜀將

軍副夏侯玄出駱谷次于興勢蜀將王林夜襲帝營帝堅臥不動林退帝謂玄曰費禕以據險距守進不獲戰攻之不可宜亟旋軍以爲後圖爽等引旋禕果馳兵趣三嶺爭險乃得過遂還拜議郎及誅曹爽帥衆衛二宮以功增邑千戶蜀將姜維之寇隴右也征西將軍郭淮自長安距之進帝位安西將軍持節屯關中爲諸軍節度淮攻維別將句安於麴久而不決帝乃進據長城南趣駱谷以疑之維懼退保南鄭安軍絕援帥衆來降轉安東將軍持節鎮許昌及大軍討王凌帝督淮北諸軍事帥師會于項增邑三百戶假金印紫綬尋進號都督統征東將軍胡遵鎮東將軍諸葛誕伐吳戰于東關二軍敗績坐失侯蜀將姜維又寇隴右揚聲欲攻狄道以帝行征西將軍次長安雍州刺史陳泰欲先賊據狄道帝曰姜維攻羌收其質任聚穀作邸閣訖而復轉行至此正欲了塞外

諸羌爲後年之資耳若實向狄道安宥宣露令外人知今揚聲言出此欲歸也維果燒營而去會新平羌胡叛帝擊破之遂耀兵靈州北虜震讐叛者悉降以功復封新城鄉侯高貴鄉公之立也以叅定策進封高都侯增封二千戶母丘儉文欽之亂大軍東征帝兼中領軍留鎮洛陽及景帝疾篤帝自京都省疾拜衛將軍景帝崩天子命帝鎮許昌尚書傅嘏帥六軍還京師帝用嘏及鐘會策自帥軍而還至洛陽進位大將軍加侍中都督中外諸軍錄尚書事輔政劔履上殿帝固辭不受

甘露元年春正月加大都督奏事不名夏六月進封高都公地方七百里加之九錫假斧鉞進號大都督劔履上殿又固辭不受秋八月庚申加假黃鉞增封三縣

二月夏五月辛未鎮東大將軍諸葛誕殺揚州刺史樂綝以淮南作亂遣子覲爲質於吳以請救議者請速伐之帝曰誕以母丘儉輕疾傾覆今必外連吳寇此爲變大而遲吾當與四方同力以全勝制之乃表曰昔黥布叛逆漢祖親征隗囂違戾光武西伐烈祖明皇帝乘輿仍出皆所以奮揚赫斯震耀威武也陛下宜暫臨戎使將士得憑天威今諸軍可五十萬以衆擊寡蔑不尅矣秋七月奉天子及皇太后東征徵兵青徐荆豫分取關中遊軍皆會淮北師次于項假廷尉何植節使淮南宣慰將士申明逆順示以誅賞甲戌帝進軍丘頭吳使文欽唐咨全端全懌等一萬餘人來救誕諸將逆擊不能禦將軍李廣臨敵不進泰山太守常時稱疾不出竝斬之以徇八月吳將朱異帥兵萬餘人留輜重於都陸輕兵至黎漿監軍石苞兗州刺史州泰禦之異退泰山太守胡烈以奇兵襲都陸焚其糧運苞泰復進擊異大破之異之餘卒餒甚食葛葉

而遁吳人殺異帝曰異不得至壽春非其罪也而吳人殺之適以謝壽春而堅誕意使其猶望救耳若其不爾彼當突圍決一日之命或謂大軍不能久省食減口冀有他變料賊之情不出此三者今當多方以亂之備其越逸此勝計也因命合圍分遣羸疾就穀淮北廩軍士大豆人三升欽聞之果喜帝愈羸形以示之多縱反間揚言吳救方至誕等益寬恣食俄而城中乏糧石苞王基竝請攻之帝曰誕之逆謀非一朝一夕也聚糧完守外結吳人自謂足據淮南欽既同惡相濟必不便走今若急攻之損游軍之力外寇卒至表裏受敵此危道也今三叛相聚於孤城之中天其或者將使同戮吾當以長策縻之但堅守三面若賊陸道而來軍糧必少吾以游兵輕騎絕其轉輸可不戰而破外賊外賊破欽等必成擒矣全懌母孫權女也得罪於吳全端兄子禕及儀奉其母來奔儀

兄靜時至壽春用鍾會計作禕儀書以譎靜靜兄弟五人帥其眾來降城中大駭

三年春正月壬寅誕欽等出攻長圍諸軍逆擊走之初誕欽內不相協及至窮蹙轉相疑貳會欽計事與誕忤誕手刃殺欽欽子鴛攻誕不克踰城降以爲將軍封侯使鴛巡城而呼帝見城上持弓者不發謂諸將曰可攻矣二月乙酉攻而拔之斬誕夷三族吳將唐咨孫曼孫彌徐韶等帥其屬皆降表加爵位廩其餒疾或言吳兵必不爲用請坑之帝曰就令亡還適見中國之弘耳於是徙之三河夏四月歸于京師魏帝命改丘頭曰武丘以旌武功五月天子以并州之太原上黨西河樂平新興雁門司州之河東平陽八郡地方七百里封帝爲晉公加九錫進位相國晉國置官司焉九讓乃止於是增邑萬戶食三縣諸子之無爵者皆封列侯秋七月

奏錄先世名臣元功大勳之子孫隨才敘用

四年夏六月分荊州置二都督王基鎮新野州秦鎮襄陽使石苞都督揚州陳騫都督豫州鍾毓都督徐州宋鈞監青州諸軍事景元元年夏四月天子復命帝爵秩如前又讓不受天子既以帝三世宰輔政非已出情不能安又慮廢辱將臨軒召百寮而行放黜五月戊子夜使宄從僕射李昭等發甲於陵雲臺召侍中王沉散騎常侍王業尚書王經出懷中黃素詔示之戒嚴俟旦沉業馳告于帝帝召護軍賈充等爲之備天子知事泄帥左右攻相府稱有所討敢有動者族誅相府兵將止不敢戰賈充叱諸將曰公畜養汝輩正謂今日耳太子舍人成濟抽戈犯蹕刺之刃出於背天子崩于車中帝召百寮謀其故僕射陳泰不至帝遣其舅荀頴與致之延於曲室謂曰玄伯天下其如我何泰曰惟腰斬賈充微以

謝天下帝曰卿更思其次泰曰但見其上不見其次於是歸罪成濟而斬之太后令曰昔漢昌邑王以罪廢爲庶人此兒亦宜以庶人禮葬之使外內咸知其所行也殺尚書王經貳於我也庚寅帝奏曰故高貴鄉公帥從駕人兵拔刃鳴鼓向臣所臣懼兵刃相接卽勅將士不得有所傷害違令者以軍法從事騎督成倅弟太子舍人濟入兵陣傷公至隕臣聞人臣之節有死無二事上之義不敢逃難前者變故卒至禍同發機誠欲委身守死惟命所裁然惟本謀乃欲上危皇太后傾覆宗廟臣忝當元輔義在安國卽駱驛申勅不得迫近輿輦而濟妄入陣間以致大變哀怛痛恨五內摧裂濟干國亂紀罪不容誅輒收濟家屬付廷尉太后從之夷濟三族與公卿議立燕王宇之子常道鄉公璜爲帝六月改元景辰天子進帝爲相國封晉公增十郡加九錫如初羣從子弟未侯者封

亭侯賜錢千萬帛萬匹固讓乃止冬十一月吳吉陽督蕭慎以書詣鎮東將軍石苞偽降求迎帝知其詐也使苞外示迎之而內爲之備

二年秋八月甲寅天子使太尉高柔授帝相國印綬司空鄭沖致晉公茅土九錫固辭

三年夏四月肅慎來獻楛矢石砮弓甲貂皮等天子命歸於大將軍府

四年春二月丁丑天子復命帝如前又固讓三月詔大將軍府增置司馬一人從事中郎二人舍人十人夏帝將伐蜀乃謀衆曰自定壽春已來息役六年治兵繕甲以擬二虜略計取吳作戰船通水道當用千餘萬功此十萬人百數十日事也又南上下溼必生疾疫今宜先取蜀三年之後因巴蜀順流之勢水陸竝進此滅虜

定號吞韓并魏之勢也計蜀戰士九萬居守成都及備他郡一作境不下四萬然則餘衆不過五萬今絆姜維於沓中使不得東顧直指駱谷出其空虛之地以襲漢中彼若嬰城守險兵勢必散首尾離絕舉大衆以屠城散銳卒以略野劔閣不下守險關頭不能自存以劉禪之闇而邊城外破士女內震其亡可知也征西將軍鄧艾以爲未有覺屢陳異議帝患之使主簿師纂爲艾司馬以喻之艾乃奉命於是徵四方之兵十八萬使鄧艾自狄道攻姜維於沓中雍州刺史諸葛緒自祁山軍于武街絕維歸路鎮西將軍鍾會帥前將軍李輔征蜀護軍胡烈等自駱谷襲漢中秋八月軍發洛陽大賚將士陳師誓衆將軍鄧敦謂蜀未可討帝斬以徇九月又使天水太守王頌攻維營隴西太守牽弘邀其前金城太守楊欣趣甘松鍾會分爲二隊入自斜谷使李輔圍王含於樂城又使部一作步將易

愷攻蔣斌於漢城會直指陽安護軍胡烈攻陷關城姜維聞之引
還王頌追敗維於彊川維與張翼廖化合軍守劔閣鍾會攻之冬
十月天子以諸侯獻捷交至乃申前命曰朕以寡德獲承天序嗣
我祖宗之洪烈遭家多難不明於訓曩者奸逆屢興方寇內侮大
懼淪喪四海以墮三祖之弘業惟公經德履哲明允廣深迪宣武
文世作保傳以輔又皇家櫛風沐雨周旋征伐劬勞王室二十有
餘載毗翼前人仍斷大政克厭不端維安社稷暨儉欽之亂公綏
援有衆分命興師統紀有方用緝寧淮浦其後巴蜀屢侵西土不
靖公奇畫指授制勝千里是以段谷之戰乘釁大捷斬將擐旗效
首萬計孫峻猾夏致寇徐方戎車首路威靈先邁黃鉞未啓鯨鯢
竄迹孫壹構隙自相疑阻幽鑒遠照奇策洞微遠人歸命作藩南
夏爰授銳卒畢力戎行暨諸葛誕滔天作逆稱兵揚楚欽咨逋罪

同惡相濟帥其螫賊以入壽春憑阻淮山敢距王命公躬擐甲冒
龔行天罰玄謀廟算遵養時晦奇兵震擊而朱異摧破神變應機
而全琮稽服取亂攻昧而高塘不守兼九伐之弘略究五兵之正
度用能戰不窮武而大敵殲潰旗不再麾而元愍受首收勅吳之
雋臣係亡命之逋虜交臂屈膝委命下吏俘馘十萬積尸成京雪
宗廟之滯恥拯兆庶之艱難掃平區域信威吳會遂戢干戈靖我
疆土天地鬼神罔不獲又乃者王室之難變起蕭牆賴公之靈弘
濟艱險宗廟危而獲安社稷墜而復寧忠格皇天功濟六合是用
疇咨古訓稽諸典籍命公崇位相國加于羣后啓土參墟封以晉
域所以方軌齊魯翰屏帝室而公遠蹈謙遜深履沖讓固辭策命
至于八九朕重違讓德抑禮虧制以彰公志于今四載上闕在昔
建侯之典下違兆庶具瞻之望惟公嚴虔王度闡濟大猷敦尚純

樸省繇節用務稽勸分九野康又耆叟荷崇養之德鰥寡蒙矜卹之施仁風興於中夏流澤布於遐荒是以東夷西戎南蠻北狄狂狡貪悍世爲寇讐者皆感義懷惠欵塞內附或委命納貢或求置官司九服之外絕域之氓曠世所希至者威浮海來享鼓舞王德前後至者八百七十餘萬口海隅幽裔無思不服雖西旅遠貢越裳九譯義無以踰維翼朕躬下匡萬國思靖殊方寧濟八極以庸蜀未賓蠻荆作猾潛謀獨斷整軍經武簡練將帥授以成策始踐賊境應時摧陷狂狡奔北首尾震潰禽其戎帥屠其城邑巴漢震疊江源雲徹地平天成誠在斯舉公有濟六合之勳加以茂德實總百揆允釐庶政敦五品以崇仁恢六典以敷訓而靖恭夙夜勞謙昧旦雖尚父之左右文武周公之勤勞王家罔以加焉昔先王選建明德光啓諸侯體國經野方制五等所以藩翼王畿垂祚百

世也故齊魯之封於周爲弘山川土田邦畿七百官司典策制殊羣后惠襄之難桓文以翼戴之勞猶受錫命之禮咸用光疇大德作範于後惟公功邁於前烈而賞闕於舊式百辟於邑人神同恨焉豈可以公謙冲而久俺弘典哉今以并州之太原上黨西河樂平新興雁門司州之河東平陽弘農雍州之馮翊凡十郡南至於華北至於陘東至於壺口西踰於河提封之數方七百里皆晉之故壤唐叔受之世作盟主實紀綱諸夏用率舊職爰昨茲土封公爲晉公命使持節兼司徒司隸校尉陔卽授印綬策書金獸符第一至第五竹使符第一至第十錫茲玄土苴以白茅建爾國家以永藩魏室昔在周召竝以公侯入作保傅其在近代鄩侯蕭何實以相國光尹漢朝隨時之制禮亦宜之今進公位爲相國加綠綬綬又加公九錫其敬德後命以公思弘大猷崇正典禮儀刑作範

芻訓四方是用錫公大輅戎輅各一玄牡二駟公道和陰陽敬授
人時嗇夫反本農殖維豐是用錫公袞冕之服赤舄副焉公光敷
顯德惠下以和敬信思順庶尹允諧是用錫公軒懸之樂六佾之
舞公鎮靖宇宙翼播聲教海外懷服荒裔欵附殊方馳義諸夏順
軌是用錫公朱戶以居公簡賢料材營求俊逸爰升多士寘彼周
行是用錫公納陛以登公嚴恭寅畏底平四國式遏寇虐苛厲不
作是用錫公武賁之士三百人公明慎用刑簡恤大中章厥天威
以糾不虔是用錫公鈇鉞各一公爰整六軍典司征伐犯命凌正
乃維誅殛是用錫公彤弓一彤矢百茲弓十茲矢千公饗祀蒸蒸
孝思維則篤誠之至通于神明是用錫公鉅鬯一卣珪瓚副焉晉
國置官司以下率由舊式往欽哉祇服朕命弘敷訓典光澤庶方
永終爾明德丕顯余一人之休命公卿將校皆詣府喻旨帝以禮

辭讓司空鄭冲率羣官勸進曰伏見嘉命顯至竊聞明公固讓冲
等眷眷實有愚心以爲聖王作制百代同風褒德賞功有自來矣
昔伊尹有莘氏之媵臣耳一佐成湯遂荷阿■之號周公藉已成
之勢據旣安之業光宅曲阜奄有龜蒙呂尙磻溪之漁者也一朝
指麾乃封營丘自是以來功薄而賞厚者不可勝數然賢哲之士
猶以爲美談况自先相國以來世有明德翼輔魏室以綏天下朝
無疵政人無謗言前者明公西征靈州北臨沙漠榆中以西望風
震服羌戎來馳回首內向東誅叛逆全軍獨尅禽闔閭之將虜輕
銳之卒以萬萬計威加南海名懾三越宇內康寧苛慝不作是以
時俗畏懷東夷獻舞故聖上覽乃昔以來禮典舊章開國光宅顯
茲太原明公宜承奉聖旨受茲介福允當天人元功盛勳光光如
彼國土嘉祚巍巍如此內外協同靡愆靡違由斯征伐則可朝服

濟江掃除吳會西塞江源望祀岷山廻戈弭節以麾天下遠無不服邇無不肅令大魏之德光于唐虞明公盛勳超於桓文然後臨滄海而謝文伯登箕山而揖許由豈不盛乎至公至平誰與爲鄰何必勤勤小讓也哉帝乃受命十一月鄧艾帥萬餘人自陰平踰絕險至江由破蜀將諸葛瞻於縣竹斬瞻傳首進軍雒縣劉禪降天子命晉公以相國總百揆於是上節傳去侍中大都督錄尚書之號焉表鄧艾爲太尉鍾會爲司徒會潛謀叛逆因密使譖艾咸熙元年春正月檻車徵艾乙丑帝奉天子西征次于長安是時魏諸王侯悉在鄴城命從事中郎山濤行軍司事鎮於鄴遣護軍賈充持節督諸軍據漢中鍾會遂反於蜀監軍衛瓘右將軍胡烈攻會斬之初會之伐蜀也西曹屬邵悌言於帝曰鍾會難信不可令行帝笑曰取蜀如指掌而衆人皆言不可唯會與吾意同滅蜀

之後中國將士人自思歸蜀之遺黎猶懷震恐縱有異志無能爲也卒如所量景辰帝至自長安三月己卯進帝爵爲王增封并前二十郡夏五月癸未天子追加舞陽宣文侯爲晉宣王舞陽忠武侯爲晉景王秋七月帝奏司空荀顛定禮儀中護軍賈充正法律尚書僕射裴秀議官制太保鄭沖總而裁焉始建五等爵冬十月丁亥奏遣吳人相國參軍徐劭散騎常侍水曹屬孫彧使吳喻孫皓以平蜀之事致馬錦等物以示威懷景午天子命中撫軍新昌鄉侯炎爲晉世子

二年春二月甲辰胸臆縣獻靈龜歸於相府夏四月孫皓使紀陟來聘且獻方物五月天子命帝冕十有二旒建天子旌旗出警入蹕乘金根車駕六馬備五時副車置旄頭雲罕樂舞八佾設鍾虞宮懸位在燕王上進王妃爲王后世子爲太子王女王孫爵命之

號皆如帝者之儀諸禁綱煩苛及法式不便於時者帝皆奏除之
晉國置御史大夫侍中常侍尚書中領軍衛將軍官秋八月辛卯
帝崩于露寢時年五十九月癸酉葬崇陽陵謚曰文王武帝受
禪追尊號曰文皇帝廟稱太祖

史臣曰世宗以叡略創基太祖以雄才成務事殷之跡空存翦商
之志彌遠三分天下功業在焉及踰劔銷氛浮淮靜亂桐宮胥怨
或所不堪若乃體以名臣格一作格之端揆周公流連於此歲魏武得
意於茲日軒懸之樂大啓南陽師摯之旨於焉北面壯矣哉包舉
天人者也爲帝之主不亦難乎

贊曰世宗繼文邦權未分三千之士其從如雲世祖無外靈關靜
氛反雖討賊終爲弑君

晉書二 帝紀第二

魏川中鳳崗
氏書印

晉書二

魏川中鳳崗
氏書印

帝紀第二

武帝

武皇帝諱炎字安世文帝長子也寬惠仁厚沉深有度量魏嘉平
中封北平亭侯歷給事中奉車都尉中壘將軍加散騎常侍累遷
中護軍假節迎常道鄉公於東武陽遷中撫軍進封新昌鄉侯及
晉國建立爲世子拜撫軍大將軍開府副貳相國初文帝以景帝
旣宣帝之嫡早世無後以帝弟攸爲嗣特加愛異自謂攝居相位
百年之後大業宜歸攸每曰此景王之天下也吾何與焉將議立
世子屬意於攸何曾等固爭曰中撫軍聰明神武有超世之才髮
委地手過膝此非人臣之相也由是遂定

咸熙二年五月立爲晉王太子八月辛卯文帝崩太子嗣相國晉

王位下令寬刑宥罪撫衆息役國內行服三日是月長人見於襄武長三丈告縣人王始曰今當太平九月戊午以魏司徒何曾爲丞相鎮南將軍王沉爲御史大夫中護軍賈充爲衛將軍議郎裴秀爲尚書令光祿大夫皆開府十一月初置四護軍以統城外諸軍乙未令諸郡中正以六條舉淹滯一曰忠恪匪躬二曰季敬盡禮三曰友于兄弟四曰絜身勞謙五曰信義可復六曰學以爲己是時晉德旣洽四海宅心於是天子知歷數有在乃使太保鄭冲奉策曰咨爾晉王我皇祖有虞氏誕膺靈運受終于陶唐亦以命于有夏惟三后陟配于天而咸用光敷聖德自茲厥後天又輯大命于漢火德旣衰乃眷命我高祖方軌虞夏四代之明顯我不敢知惟王乃祖乃父服膺明哲輔亮我皇家勳德光于四海格爾上下神祇罔不克順地平天成萬邦以乂應受上帝之命協皇極之

中肆予一人祇承天序以敬授爾位歷數實在爾躬允執其中天祿永終於戲王其欽順天命率循訓典底綏四國用保天休無替我二皇之弘烈帝初以禮讓魏朝公卿何曾王沈等固請乃從之泰始元年冬十二月景寅設壇于南郊百僚在位及匈奴南單于四夷會者數萬人柴燎告類于上帝曰皇帝臣炎敢用玄牡明告于皇皇后帝魏帝稽協皇運紹天明命以命炎昔者唐堯熙隆大道禪位虞舜舜又以禪禹邁德垂訓多歷年載暨漢德旣衰太祖武皇帝撥亂濟時扶翼劉氏又用受命于漢奧在魏室仍世多故幾於顛墜實賴有晉匡拯之德用獲保厥肆祀弘濟于艱難此則晉之有大造于魏也誕惟四方罔不祇順廓清梁岷包懷揚越八紘同軌祥瑞屢臻天人協應無思不服肆予憲章三后用集大命于茲炎維德不嗣辭不獲命於是羣公卿士百辟庶僚黎獻陪隸

暨于百蠻君長僉曰皇天鑒下求人之瘼既有成命固非克讓所得距違天序不可以無統人神不可以曠主炎虔奉皇運寅畏天威敬簡元辰升壇受禪告類上帝永答衆望禮畢卽洛陽宮幸太極前殿詔曰昔朕皇祖宣王聖哲欽明誕應期運熙帝之載肇啟洪基伯考景王履道宜猷緝熙諸夏至于皇考文王叡哲光遠允協靈祇應天順時受茲明命仁濟于宇宙功格于上下肆魏氏弘鑒于古訓儀刑于唐虞疇咨羣后爰輯大命于朕身予一人畏天之命用不敢違惟朕寡德負荷洪烈託于王公之上以君臨四海惴惴惟懼罔知所濟惟爾股肱爪牙之佐文武不貳之臣乃祖乃父實左右我先王光隆我大業思與萬國共享休祚於是大赦改元賜天下爵人五級鰥寡孤獨不能自存者穀人五斛復天下租賦及關市之稅一年逋債宿負皆勿收除舊嫌解禁錮亡官失爵

者悉復之丁卯遣太僕劉原告于太廟封魏帝爲陳留王邑萬戶居於鄴宮魏氏諸王皆爲縣侯追尊宣王爲宣皇帝景王爲景皇帝文王爲文皇帝宣王妃張氏爲宣穆皇后尊太妃王氏曰皇太后宮曰崇化封皇叔祖父孚爲安平王皇叔父幹爲平原王亮爲扶風王佃爲東莞王駿爲汝陰王彤爲梁王倫爲琅邪王皇弟攸爲齊王鑿爲樂安王幾爲燕王皇從伯父望爲義陽王皇從叔父輔爲渤海王晃爲下邳王壤爲太原王珪爲高陽王衡爲常山王子文爲沛王泰爲隴西王權爲彭城王綏爲范陽王遂爲濟南王遜爲譙王睦爲中山王淩爲北海王斌爲陳王皇從父兄洪爲河間王皇從父弟楸爲東平王以驃騎將軍石苞爲大司馬封樂陵公車騎將軍陳騫爲高平公衛將軍賈充爲車騎將軍魯公尙書令裴秀爲鉅鹿公侍中荀勗爲濟北公太保鄭沖爲太傅壽光公

太尉王祥爲太保睢陵公丞相何曾爲太尉朗陵公御史大夫王
沉爲驃騎將軍博陵公司空荀顛爲臨淮公鎮北大將軍衛瓘爲
菑陽公其餘增封進爵各有差文武普增位二等改景初歷爲太
始歷臘以酉社以丑戊辰下詔大弘儉約出御府珠玉玩好之物
頒賜王公以下各有差置中軍將軍以統宿衛七軍已巳詔陳畱
王載天子旌旗備五時副車行魏正朔郊祀天地禮樂制度皆如
魏舊上書不稱臣賜山陽公劉康安樂公劉禪子弟一人爲駙馬
都尉乙亥以安平王孚爲太宰假黃鉞大都督中外諸軍事詔曰
昔王凌謀廢齊王而王竟不足以守位鄧艾雖矜功失節然束手
受罪今大赦其家還使立後興滅繼絕約法省刑除魏氏宗室禁
錮諸將吏遭三年喪者遣寧終喪百姓復其徭役罷部曲將長吏
以下質任省郡國御調禁樂府靡麗百戲之伎及雕文游畋之具

開直言之路置諫官以掌之是月鳳凰六青龍三白龍二麒麟各
一見于郡國

二年春正月景戌遣兼侍中侯史光等持節四方循省風俗除禳
祝之不在祀典者丁亥有司請建七廟帝重其役不許庚寅罷雞
鳴歌辛丑尊景皇帝夫人羊氏曰景皇后宮曰弘訓景午立皇后
楊氏二月除漢宗室禁錮已未常山王衡薨詔曰五等之封皆錄
舊勳本爲縣侯者傳封次子爲亭侯爲鄉侯爲關內侯亭侯爲關
中侯皆食本戶十分之一丁丑郊祀宣皇帝以配天宗祀文王帝
於明堂以配上帝庚午詔曰古者百官官箴王闕然保氏特以諫
諍爲職今之侍中常侍實處比位擇其能正色弼違匡救不逮者
以兼此選三月戊戌吳人來弔祭有司奏爲答詔帝曰昔漢文光
武懷撫尉佗公孫述皆未正君臣之儀所以羈縻未賓也皓遣使

之始未知國慶但以書答之夏五月戊辰詔曰陳留王操尚謙沖每事輒表非所以優崇之也主者喻意非大事皆使王官表上之壬子驃騎將軍博陵公王沉卒六月壬申濟南王遂薨秋七月辛巳榮太廟致荆山之木采華山之石鑄銅柱十二塗以黃金鏤以百物綴以明珠戊戌譙王遜薨景午晦日有食之八月景辰省右將軍官初帝雖從漢魏之制既葬除服而深衣素冠降席撤膳哀敬如喪者戊辰有司奏改服進膳不許遂禮終而後復吉及太后之喪亦如之九月乙未散騎常侍皇甫陶傳玄領諫官上書諫諍有司奏請寢之詔曰凡關言人主人臣所至難而苦不能聽納自古忠臣直士之所慷慨也每陳事出付主者多從深刻乃云恩貸當由主上是何言乎其詳評議戊戌有司奏大晉繼三皇之蹤蹈舜禹之跡應天順時受禪有魏宜一用前代正朔服色皆如虞遵

唐故事奏可冬十月景午朔日有食之丁未詔曰昔舜葬蒼梧農不易畝禹葬成紀市不改肆上惟祖考清簡之旨所徙陵十里內居人動爲煩擾一切停之十一月己卯倭人來獻方物并園丘方丘於南北郊二至之祀合於二郊罷山陽公國督軍除其禁制己丑追尊景帝夫人夏侯氏爲景懷皇后辛卯遷祖禰神主于太廟十二月罷農官爲郡縣是歲鳳凰六青龍十黃龍九麒麟各一見于郡國

三年春正月癸丑白龍二見于弘農澠池丁卯立皇子衷爲皇太子詔曰朕以不德託于四海之上兢兢祇畏懼無以康濟寓內思與天下式明王度正本清源於置胤樹嫡非所先務又近世每建太子寬宥施惠之事間不獲已順從王公卿士之議耳方今世運垂平將陳之以德義示之以好惡使百姓蠲多幸之慮篤終始之

行曲惠小仁故無取焉咸使知聞三月戊寅初令二千石得終三年喪丁未晝昏罷武衛將軍官以李熹爲太子太傅大山石崩夏四月戊午張掖太守焦勝上言氏池縣大柳谷口有玄石一所白晝成文實大晉之休祥圖之以獻詔以制幣告于太廟藏之天府秋八月罷都護將軍以其五署還光祿勳九月甲申詔曰古者以德詔爵以庸制祿雖下士猶食上農外足以奉公忘私內足以養親施惠今在位者祿不代耕非所以崇化之本也其議增吏俸賜王公以下帛各有差以太尉何曾爲太保義陽王望爲太尉司空荀顛爲司徒冬十月聽士卒遭父母喪者非在疆場皆得奔赴十二月徙宗聖侯孔震爲奉聖亭侯山陽公劉康來朝禁星氣讖緯之學

四年春正月辛未以尚書令裴秀爲司空景戌律令成封爵賜帛

各有差有星孛於軫丁亥帝耕於藉田戊子詔曰古設象刑而衆不犯今雖叅夷而姦不絕何德刑相去之遠哉先帝深愍黎元哀矜庶獄乃命羣后考正典刑朕守遺業永惟保乂皇基思與萬國以無爲爲政方今陽春養物東作始興朕親率王公卿士耕藉田千畝又律令旣就班之天下將以簡法務本惠育海內宜寬有罪使得自新其大赦天下長吏郡丞長史各賜馬一匹二月庚子增置山陽公國相郎中令陵令雜工宰人鼓吹車馬各有差罷中軍將軍置北軍中侯官甲寅以東海劉儉有至行拜爲郎以中軍將軍羊祜爲尚書左僕射東莞王抽爲尚書右僕射三月戊子皇太后王氏崩夏四月戊戌太保睢陵公王祥薨巳亥祔葬文明皇后王氏於崇陽陵罷振威揚威護軍官置左右積弩將軍六月甲申朔詔曰郡國守相三載一巡行屬縣必以春此古者所以述職宣

風展義也見長吏觀風俗協禮律考度量存問耆老親見百年錄
囚徒理冤枉詳察政刑得失知百姓所患苦無有遠近便若朕親
臨之敦喻五教勸務農功勉勵學者思勤正典無爲百家庸末致
遠必泥士庶有好學篤道孝弟忠信清白異行者舉而進之有不
孝敬於父母不長悌於族黨悖禮棄常不率法令者糾而罪之田
疇闕生業修禮教設禁令行則長吏之能也人窮匱農事荒姦盜
起刑獄煩下陵上替禮義不興斯長吏之否也若長吏在官公廉
慮不及私正色直節不飾名譽者及身行貪穢諂黷求容公節不
立而私門日富者竝謹察之揚清激濁舉善彈違此朕所以垂拱
總綱責成於良二千石也於戲戒哉秋七月太山石崩衆星西流
戊午遣使者侯史光循行天下己卯謁崇陽陵九月青徐兗豫四
州大水伊洛溢合於河開倉以振之詔曰雖詔有所欲及奏得可

而於事不便者皆不可隱情冬十月吳將施績入江夏萬郁寇襄
陽遣太尉義陽王望屯龍陂荊州刺史胡烈擊敗郁吳將顧容寇
鬱林太守毛炆大破之斬其交州刺史劉俊將軍修則十一月吳
將丁奉等出芍陂安東將軍汝陰王駿與義陽王望擊走之己未
詔王公卿尹九郡國守相舉賢良方正直言之士十二月班五條
詔書於郡國一曰正身二曰勤百姓三曰撫孤寡四曰敦本息末
五曰去人事庚寅帝臨聽訟觀錄廷尉洛陽獄囚親平決焉扶南
林邑各遣使來獻

五年春正月癸巳申戒郡國計吏守相令長務盡地利禁游食商
販景申帝臨聽訟觀錄囚徒多所原遣青龍二見於滎陽二月以
雍州隴右五郡及涼州之金城梁州之陽平置秦州辛巳白龍二
見於趙國青徐兗三州水遣使振恤之壬寅以尚書左僕射羊祜

都督荊州諸軍事征東大將軍衛瓘都督青州諸軍事東莞王佃
鎮東大將軍都督徐州諸軍事丁亥詔曰古者歲書羣吏之能否
三年而誅賞之諸令使前後但簡遺疎劣而無有勸進非黜陟之
謂也其條勤能有稱尤異者歲以爲常吾將議其功勞已未詔蜀
相諸葛亮孫京隨才署吏夏四月地震五月辛卯朔鳳凰見於趙
國曲赦交趾九真日南五歲刑六月鄴奚官督郭廩上疏陳五事
以諫言甚切直擢爲屯留令西平人麴路伐登聞鼓言多祇謗有
司奏棄市帝曰朕之過也捨而不問罷鎮軍將軍復置左右將軍
官秋七月延羣公詢讜言九月有星孛于紫宮冬十月景子以汲
郡太守王宏有政績賜穀千斛十一月遣封謚皇弟兆爲城陽哀
王以皇子景度嗣十二月詔州郡舉勇猛秀異之才
六年春正月丁亥朔帝臨軒不設樂吳將丁奉入渦口揚州刺史

牽弘擊走之三月赦五歲刑已下夏四月白龍二見於東莞五月
立壽安亭侯承爲南宮王六月戊午秦州刺史胡烈擊叛虜於萬
斛堆力戰死之詔遣尚書石鑒行安西將軍都督秦州諸軍事與
奮威護軍田章討之秋七月丁酉復隴右五郡遇寇害者租賦不
能自存者廩貸之乙巳城陽王景度薨詔曰自泰始以來大事皆
撰錄秘書寫副後有其事輒宜綴集以爲常丁未以汝陰王駿爲
鎮西大將軍都督雍涼二州諸軍事九月大宛獻汗血馬焉耆來
貢方物冬十一月幸辟雍行鄉飲酒之禮賜太常博士學生雍本缺
二字帛牛
酒各有差立皇子東爲汝南王十二月吳夏口督前將軍孫秀帥
衆來奔拜驃騎將軍開府儀同三司封會稽公戊辰復置鎮軍官
七年春正月景午皇太子冠賜王公以下帛各有差匈奴帥劉猛
叛出塞三月孫皓帥衆趨壽陽遣大司馬望屯淮北以距之三月

景戌司空鉅鹿公裴秀薨癸巳以中護軍王業爲尚書左僕射高陽王珪爲尚書右僕射孫秀部將何崇帥衆五千人來降夏四月九真太守董元爲吳將虞汜所攻軍敗死之北地胡寇金城涼州刺史牽弘討之羣虜內叛圍弘於青山弘軍敗死之五月立皇子憲爲城陽王雍涼秦三州饑赦其境內殊死以下閏月大雪太官減膳詔交趾三郡南中諸郡無出今年戶調六月詔公卿以下舉將帥各一人辛丑大司馬義陽王望薨大雨霖伊洛河溢流居人四千餘家殺三百餘人有詔振貸給棺秋七月癸酉以車騎將軍賈充爲都督秦涼二州諸軍事吳將陶璜等圍交趾太守楊稷與鬱林太守毛炅及日南等三郡降於吳八月景戌以征東大將軍衛瓘爲征北大將軍都督幽州諸軍事景申城陽王憲薨分益州之南中四郡置寧州曲赦四郡殊死已下冬十月丁丑日有食之

十一月丁巳衛公姬署薨十二月大雪罷中領軍并北軍中侯以光祿大夫鄭袤爲司空

八年春正月監軍何楨討匈奴劉猛屢破之左部帥李恪殺猛而降癸亥帝耕于藉田二月乙亥禁彫文綺組非法之物壬辰太宰安平王孚薨詔內外羣官舉任邊郡者各三人帝與右將軍皇甫陶論事陶與帝爭言散騎常侍鄭徽表請罪之帝曰讜言蹇諤所望於左右也人主常以阿媚爲患豈以爭臣爲損哉徽越職妄奏豈朕之意遂免徽官夏四月置後將軍以備四軍六月益州牙門張弘誣其刺史皇甫晏反殺之傳首京師弘坐伏誅夷三族壬辰大赦景申詔復隴右四郡遇寇害者田租秋七月以車騎將軍賈充爲司空九月吳西陵督步闡來降拜衛將軍開府儀同三司封宜都公吳將陸抗攻闡遣車騎將軍羊祜帥衆出江陵荊州刺史

楊肇迎闡於西陵巴東監軍徐胤擊建平以救闡冬十月辛未朔日有食之十二月肇攻抗不克而還闡城陷爲抗所禽

九年春正月辛酉司空密陵侯鄭袤薨二月癸巳司徒樂陵公石苞薨立安平亭侯隆爲安平王三月立皇子祗爲東海王夏四月戊辰朔日有食之五月旱以太保何曾領司徒六月乙未東海王祗薨秋七月丁酉朔日有食之吳將魯淑圍弋陽征虜將軍王渾擊敗之罷五官左右中郎將弘訓太僕衛尉大長秋等官鮮卑寇廣寧殺略五千人詔聘公卿以下子女以備六官采擇未畢權禁斷婚姻冬十月辛巳制女年十七父母不嫁者使長吏配之十一月丁酉臨宣武觀大閱諸軍甲辰乃罷

十年春正月辛亥帝耕于藉田閏月癸酉太傅壽光公鄭沖薨己卯高陽王珪薨庚辰太原王瓌薨丁亥詔曰嫡庶之別所以辨上下明貴賤而近世以來多皆內寵登妃后之職亂尊卑之序自今以後皆不得登用妾媵以爲嫡正二月分幽州五郡置平州三月癸亥日有食之夏四月己未太尉臨淮公荀顗薨六月癸巳臨聽訟觀錄囚徒多所原遣是夏大蝗秋七月景寅皇后楊氏崩壬午吳平虜將軍孟泰偏將軍王嗣等帥衆降八月涼州虜寇金城諸郡鎮西將軍汝陰王駿討之斬其帥乞文泥等戊申葬元皇后于峻陽陵九月癸亥以大將軍陳騫爲太尉攻拔吳枳里城獲吳立信校尉莊祐吳將孫遵李承帥衆寇江夏太守稽喜斬破之立河橋于富平津冬十一月立城東七里澗右橋庚午帝臨宣武觀大閱諸軍十二月有星孛于軫置藉田令立太原王子緝爲高陽王吳威北將軍嚴聰揚威將軍嚴整偏將軍朱買來降是歲鑿陝南山決河東注洛以通運漕

咸寧元年春正月戊午朔大赦改元二月以將士應已娶者多家
有五女者給復辛酉以故鄴令夏謨有清稱賜穀百斛以奉祿薄
賜公卿以下帛有差叛虜樹機能送質請降夏五月下邳廣陵大
風拔木壞廬舍六月鮮卑力微遣子來獻吳人寇江夏西域戊巳
校尉馬循討叛鮮卑破之斬其渠帥戊申置太子詹事官秋七月
甲申晦日有食之都國螟八月壬寅沛王子文薨以故太傅鄭冲
太尉荀頴司徒石苞司空裴秀驃騎將軍王沉安平獻王孚等及
太保何曾司空賈充太尉陳騫中書監荀勗平南將軍羊祜齊王
攸等皆列於銘饗九月甲子青州螟徐州大水冬十月乙酉常山
王殷薨癸巳彭城王權薨十一月癸亥大閱於宣武觀至于巳巳
十二月丁亥追尊宣帝廟曰高祖景帝曰世宗文帝曰太祖是月
大疫洛陽死者太半封裴頠爲鉅鹿公

二年春正月以疾疫廢朝賜諸散吏至于士卒絲各有差二月景
戌河間王洪薨甲午赦五歲刑以下東夷八國歸化并州虜犯塞
監并州諸軍事胡奮擊破之初燉煌太守尹璩卒州以燉煌令梁
澄領太守事議郎令狐豐廢澄自領郡事豐死弟宏代之至是涼
州刺史楊欣斬宏傳首洛陽先是帝不豫及瘳羣臣上壽詔曰每
念頃遇疫氣死亡爲之愴然豈以一身之休息忘百姓之艱邪諸
上禮者皆絕之夏五月鎮西大將軍汝陰王駿討北胡斬其渠帥
吐敦立國子學庚午大雩六月癸丑薦荔枝于太廟甲戌有星孛
于氏自春旱至于是月始雨吳京下督孫楷帥衆來降以爲車騎
將軍封丹陽侯白龍二見于新興井中秋七月有星孛于大角吳
臨平湖自漢末壅塞至是自開父老相傳云此湖塞天下亂此湖
開天下平癸丑安平王隆薨東夷十七國內附河南魏郡暴水殺

百餘人詔給棺鮮卑阿羅多等寇邊西域戊巳校尉馬循討之斬首四千餘級獲生九千餘人於是來降八月庚辰河東平陽地震巳亥以太保何曾爲太傅太尉陳騫爲大司馬司空賈充爲太尉鎮東大將軍齊王攸爲司空有星孛于太微九月又孛于翼丁未起太倉於城東常平倉於東西市閏月荊州五郡水流四千餘家冬十月以汝陰王駿爲征西大將軍平南將軍羊祜爲征南大將軍丁卯立皇后楊氏大赦賜王公以下及于鰥寡各有差十一月白龍二見于梁國十二月徵處士安定皇甫謐爲太子中庶子封后父鎮軍將軍楊駿爲臨晉侯是月以平州刺史傅詢前廣平太守孟桓清白有聞詢賜帛二百匹桓百匹三年春正月景子朔日有食之立皇子裕爲始平王安平穆王隆弟敦爲安平王詔曰宗室戚屬國之枝葉欲令奉率德義爲天下

式然處富貴而能慎行者寡名穆公糾合兄弟而賦唐棣之詩此姬氏所以本枝百世也今以衛將軍扶風王亮爲宗師所當施行皆諮之於宗師也庚寅始平王裕薨有星孛於西方使征北大將軍衛瓘討鮮卑力微三月平虜護軍文淑討叛虜樹機能等竝破之有星孛于胃乙未帝將射雉慮損麥苗而止夏五月戊子吳將郤凱夏祥帥衆七千餘人來降六月益梁八郡水殺三百餘人没邸閣別倉秋七月以都督豫州諸軍事王渾爲都督揚州諸軍事中山王睦以罪廢爲丹水侯八月癸亥徙扶風王亮爲汝南王東莞王佃爲琅邪王汝陰王駿爲扶風王琅邪王倫爲趙王渤海王輔爲太原王太原王顥爲河間王北海王陵爲任城王陳王斌爲西河王汝南王東爲南陽王濟南王耽爲中山王河間王威爲章武王立皇子瑋爲始平王允爲濮陽王該爲新都王遐爲清河王

鉅平侯羊祜爲南城侯以汝南王亮爲鎮南大將軍大風拔樹暴寒且冰郡國五隕霜傷穀九月戊子以左將軍胡奮爲都督江比諸軍事兗豫徐青荆益梁七州大水傷秋稼詔振給之立齊王子蕤爲遼東王贊爲廣漢王冬十一月景戌帝臨宣武觀大閱至于壬辰十二月吳將孫慎入江夏汝南略千餘家而去是歲西北雜虜及鮮卑匈奴五溪蠻夷東夷三國前後千餘輩各帥種人部落內附

四年春正月庚午朔日有食之三月甲申尚書左僕射盧欽卒辛酉以尚書右僕射山濤爲尚書左僕射東夷六國來獻夏四月蚩尤旗見於東井六月丁未陰平廣武地震甲子又震涼州刺史楊欣與虜若羅拔能等戰于武威敗績死之弘訓皇后羊氏崩秋七月己丑祔葬景獻皇后羊氏于峻平陵庚寅高陽王緝薨癸巳范

陽王綏薨荆楊郡國二十皆大水九月以太傅何曾爲太宰辛巳以尚書令李胤爲司徒冬十月以征北大將軍衛瓘爲尚書令揚州刺史應綽伐吳皖城斬首五千級焚穀米百八十萬斛十一月辛巳太醫司馬程據獻雉頭裘帝以奇技異服典禮所禁焚之於殿前甲申勅內外敢有犯者罪之吳昭武將軍劉翻厲武將軍祖始來降辛卯以尚書杜預都督荊州諸軍事征南大將軍羊祜卒十二月乙未西河王斌薨丁未太宰朗陵公何曾薨是歲東夷九國內附

五年春正月虜帥樹機能攻陷涼州乙丑使討虜護軍武威太守馬隆擊之二月甲午白麟見于平原三月匈奴都督拔奕虛帥部落歸化乙亥以百姓饑饉減御膳之半有星孛于柳夏四月又孛于女御大赦降除部曲督以下質任丁亥郡國八雨雹傷秋稼壞

百姓廬舍秋七月有星孛于紫宮九月甲午麟見于河南冬十月
戊寅匈奴餘渠都督獨雍等帥部落歸化汲郡人不準掘魏襄王
冢得竹簡小篆古書十餘萬言藏于秘府十一月大舉伐吳遣鎮
軍將軍琅邪王伷出涂中安東將軍王渾出江西建威將軍王戎
出武昌平西將軍胡奮出夏口鎮南大將軍杜預出江陵龍驤將
軍王濬廣武將軍唐彬率巴蜀之卒浮江而下東西凡二十餘萬
以太尉賈充爲大都督行冠軍將軍楊濟爲副總統衆軍十二月

馬隆擊叛虜樹機能大破斬之涼州平肅慎來獻楛矢石柈

太康元年春正月己丑朔五色氣冠日癸丑王渾克吳尋陽賴鄉
諸城獲吳威武將軍周興二月戊午王濬唐彬等尅丹陽城庚申
又克西陵殺西陵都督鎮軍將軍雷憲征南將軍成璩西陵監鄭
廣壬戌濬又克夷道樂鄉城殺夷道監陸一本作陵晏水軍都督

陸景甲戌杜預克江陵斬吳江陵督王

一本作五

延平南將軍胡奮克

江安於是諸軍竝進樂鄉荆門諸戍相次來降乙亥以濬爲都督
益梁二州諸軍事復下詔曰濬彬東下埽除巴丘與胡奮王戎共
平夏口武昌順流長驚直造秣陵與奮戎審量其宜杜預當鎮靜
零桂懷輯衡陽大兵旣過荆州南境固當傳檄而定預當分萬人
給濬七千給彬夏口旣平奮宜以七千人給濬武昌旣了戎當以
六千人增彬太尉充移屯項總督諸方濬進破夏口武昌遂泛舟
東下所至皆平王渾周浚與吳丞相張悌戰于版橋大敗之斬悌
及其將孫震沈瑩傳首洛陽孫皓窮蹙請降送璽綬於琅邪王伷
三月壬申王濬以舟師至于建鄴之石頭孫皓大懼面縛輿櫬降
于軍門濬杖節解縛焚櫬送于京都收其圖籍克州四郡四十三
縣三百一十三戶五十二萬三千吏三萬二千兵二十三萬男女

口二百三十萬其牧守已下皆因吳所置除其苛政示之簡易吳人大悅乙酉大赦改元大酺五日恤孤老困窮夏四月河東高平雨雹傷秋稼遣兼侍中張側黃門侍郎朱震分使楊越慰其初附白麟見于頓丘三河魏郡弘農雨雹傷宿麥五月辛亥封孫皓爲歸命侯拜其太子爲中郎諸子爲郎中吳之舊望隨才擢敘孫氏大將戰亡之家徙於壽陽將吏渡江復十年百姓及百工復二十年景寅帝臨軒大會引皓升殿羣臣咸稱萬歲丁卯薦鄴淶酒于太廟郡國六雹傷秋稼庚午詔諸士卒年六十以上罷歸于家庚辰以王濬爲輔國大將軍襄陽侯杜預當陽侯王戎安豐侯唐彬上庸侯賈充琅邪王伉以下增封於是論功行封賜公卿以下帛各有差六月丁丑初置翊軍校尉官封丹水侯睦爲高陽王甲申東夷十國歸化秋七月虜軻成泥寇西平浩豐殺督將以下三百

餘人東夷二十國朝獻庚寅以尚書魏舒爲尚書右僕射八月車師前部遣子入侍己未封皇弟延祚爲樂平王白龍三見于永昌九月羣臣以天下一統屢請封禪帝謙讓弗許冬十月丁巳除五女復十二月戊辰廣漢王贊薨

二年春二月淮南丹陽地震三月景申安平王敦薨賜王公以下吳生口各有差詔選孫皓妓妾五千人入宮東夷五國朝獻夏六月東夷五國內附郡國十六雨雹大風拔樹壞百姓廬舍江夏泰山水流居人三百餘家秋七月上黨又暴風雨雹傷秋稼八月有星孛于張冬十月鮮卑慕容廆寇昌黎十一月壬寅大司馬陳騫薨有星孛于軒轅鮮卑寇遼西平州一本作川刺史鮮于嬰討破之三年春正月丁丑罷秦州并雍州甲午以尚書張華都督幽州諸軍事三月安北將軍嚴詢敗鮮卑慕容廆於昌黎殺傷數萬人夏

四月庚午太尉魯公賈充薨閏月景子司徒廣陸侯李胤薨癸丑
白龍二見于濟南秋八月罷平州寧州刺史三年一入奏事九月
東夷二十九國歸化獻其方物吳故將莞恭帛奉舉兵反攻害建
鄴令遂圍揚州徐州刺史稽喜討平之冬十二月甲申以司空齊
王攸爲大司馬督青州諸軍事鎮東大將軍琅邪王伋爲撫軍大
將軍汝南王亮爲太尉光祿大夫山濤爲司徒尚書令衛瓘爲司
空景申詔四方水旱甚者無出田租

四年春正月甲申以尚書右僕射魏舒爲尚書左僕射下邳王晃
爲尚書右僕射戊午司徒山濤薨二月己丑立長樂亭侯寔爲北
海王三月辛丑朔日有食之癸丑大司馬齊王攸薨夏四月任城
王陵薨五月己亥大將軍琅邪王伋薨徙遼東王蕤爲東萊王六
月增九卿禮秩牂柯僚二千餘落內屬秋七月壬子以尚書右僕

射下邳王晃爲都督青州諸軍事景寅兗州大水復其田租八月
鄆善國遣子入侍假其歸義侯以隴西王泰爲尚書右僕射冬十
一月戊午新都王該薨以尚書左僕射魏舒爲司徒十二月庚午
大閱于宣武觀是歲河內及荊州揚州大水

五年春正月己亥青龍二見于武庫井中二月景寅立南宮王子
玷爲長樂王壬辰地震夏四月任城魯國池水赤如血五月景午
宣帝廟梁折六月初置黃沙獄秋七月戊申皇子恢薨任城梁國
中山雨雹傷秋稼減天下戶課三分之一九月南安大風折木郡
國五大水隕霜傷秋稼冬十一月甲辰太原王輔薨十二月庚午
大赦林邑大秦國各遣使來獻閏月鎮南大將軍當陽侯杜預卒
六年春正月甲申朔以比歲不登免租貸宿負戊辰以征南大將
軍王渾爲尚書左僕射尚書褚契都督揚州諸軍事楊濟都督荆

州諸軍事三月郡國六隕霜傷桑麥夏四月扶南等十國來獻叅
離四千餘落內附郡國四旱十大水壞百姓廬舍秋七月巴西地
震八月景戌朔日有食之減百姓絲絹三分之一白龍見于京兆
以鎮軍大將軍王濬爲撫軍大將軍九月景子山陽公劉康薨冬
十月南安山崩水出南陽郡獲兩足獸龜茲焉耆國遣子人侍十
二月甲申大閱于宣武觀旬日而罷庚子撫軍大將軍襄陽侯王
濬卒

七年春正月甲寅朔日有食之乙卯詔曰比年災異屢發日蝕三
朝地震山崩邦之不臧實在朕躬公卿大臣各上封事極言其故
勿有所諱夏五月郡國十三旱鮮卑慕容廆寇遼東秋七月朱提
山崩犍爲地震八月東夷十一國內附京兆地震九月戊寅驃騎
將軍扶風王駿薨郡國八大水冬十一月壬子以隴西王泰都督

關中諸軍事十二月遣侍御史巡遭水諸郡出後宮才人妓女以
下二百七十人歸于家始制大臣聽終喪三年己亥河陰雨赤雪
二頃是歲扶南等二十一國馬韓等十一國遣使來獻

八年春正月戊申朔日有食之太廟殿陷三月乙丑臨商觀震夏
四月齊國大水隕霜傷麥六月魯國大風拔樹木壞百姓廬舍郡
國八大水秋七月前殿地陷深數丈中有破船八月東夷二國內
附九月改營太廟冬十月南康平固縣吏李豐反聚眾攻郡縣自
號將軍十一月海安令蕭輔聚眾反十二月吳興人蔣廸聚黨反
圍陽羨縣州郡捕討皆伏誅南夷扶南西域康居國各遣使來獻
是歲郡國五地震

九年春正月壬申朔日有食之詔曰興化之本由政平訟理也二
千石長吏不能勤恤人隱而輕挾私故與長刑獄又多貪濁煩撓

百姓其勅刺史二千石糾其穢濁舉其公清有司議其黜陟令內外羣官舉清能拔寒素江東四郡地震二月尚書右僕射陽夏侯胡奮卒以尚書朱整爲尚書右僕射三月丁丑皇后親桑于西郊賜帛各有差壬辰初并二社爲一夏四月江南郡國八地震隴西隕霜傷宿麥五月義陽王奇有罪黜爲三縱亭侯詔內外羣官舉守令之才六月庚子朔日有食之徙章武王威爲義陽王郡國三十二大旱傷麥秋八月壬子星隕如雨詔郡國五歲刑以下決遣無畱庶獄九月東夷七國詣校尉內附郡國二十四螟冬十二月癸卯立河間平王洪子英爲章武王戊申青龍黃龍各一見于魯國

十年夏四月以京兆太守劉霄陽平太守梁柳有政績各賜穀千斛郡國八隕霜太廟成乙巳遷神主于新廟帝迎于道左遂祫祭

大赦文武增位一等作廟者二等丁未尚書右僕射廣興侯朱整

卒癸丑崇聖

一本作賢

殿災五月鮮卑慕容廆來降東夷十一國內附

六日庚子山陽公劉瑾薨復置二社冬十月壬子徙南宮王承爲武邑王十一月景辰守尚書令左光祿大夫荀勗卒帝疾瘳賜王公以下帛有差含章殿鞠室火甲申以汝南王亮爲大司馬大都督假黃鉞改封南陽王東爲秦王始平王瑋爲楚王濮陽王允爲淮南王竝假節之國各統方州軍事立皇子乂爲長沙王穎爲成都王晏爲吳王熾爲豫章王演爲代王皇孫適爲廣陵王立濮陽王子迪爲漢王始平王子儀爲毗陵王汝南王次子蒙爲西陽公徙扶風王暢爲順陽王暢弟歆爲新野公琅邪王覲弟澹爲東武公繇爲東安公濯爲廣陵公卷爲東莞公改諸王國相爲內史十二月庚寅太廟梁折是歲東夷絕遠三十餘國西南夷二十餘國

來獻虜壬戌奚軻男女十萬口來降

太熙元年春正月辛酉朔改元己巳以尚書左僕射王渾爲司徒
司空衛瓘爲太保二月辛丑東夷七國朝貢琅邪王覲薨三月甲
子以右光祿大夫石鑒爲司空夏四月辛丑以侍中車騎將軍楊
駿爲太尉都督中外諸軍錄尚書事己酉帝崩于含章殿時年五
十五葬峻陽陵廟號世祖帝宇量弘厚造次必於仁恕容納讜正
未嘗失色於人明達善謀能斷大事故得撫寧萬國綏靜四方承
魏氏奢侈刻弊之後百姓思古之遺風乃厲以恭儉敦以寡慾有
司嘗奏御牛青絲紉斷詔以青麻代之臨朝寬裕法度有恒高陽
許允旣爲文帝所殺允子奇爲太常丞帝將有事於太廟朝議以
奇受害之門不欲接近請出爲長史帝乃追述允夙望稱奇之才
擢爲祠部郎時論稱其夷曠平吳之後天下乂安遂怠於政術耽

於遊宴寵愛后黨親貴當權舊臣不得專任彝章紊廢請謁行矣
爰至末年知惠帝弗克負荷然恃皇孫聰睿故無廢立之心復慮
非賈后所生終致危敗遂與腹心共曷後事說者紛然久而不定
竟用王佑之謀遣太子母弟秦王東都督關中楚王瑋淮南王允
竝鎮守要害以疆帝室又恐楊氏之偏復以佑爲北軍中候以典
禁兵旣而寢疾彌留至於大漸佐命元勳皆已先沒羣臣惶惑計
無所從會帝小差有詔以汝南王亮輔政又欲令朝士之有名望
年少者數人佐之楊駿祕而不宣帝復尋至迷亂楊后輒爲詔以
駿輔政促亮進發帝尋小間問汝南王來未意欲見之有所付託
左右答言未至帝遂困篤中朝之亂實始於斯矣

制曰武皇承基誕膺天命握卣御宇敷化導民以佚代勞以治易
亂絕縑綸之貢去雕琢之飾制奢俗以變儉約止澆風而反淳朴

雅好直言畱心采擢劉毅裴楷以質直見容稽紹許奇雖仇讐不
棄仁以御物寬而得衆宏略大度有帝王之量焉於時民和俗靜
家給人足聿修武用思啓封疆決神算於深衷斷雄勗於議表馬
隆西伐王濬南征師不延時德虜削迹兵無血刃楊越爲墟通上
代之不通服前王之未服禎祥顯應風教肅清天人之功成矣霸
王之業大矣雖登封之禮讓而不爲驕泰之心因斯以起見土地
之廣謂萬葉而無虞覩天下之安謂千年而永治不知處廣以思
狹則廣可長廣居治而忘危則治無常治加之建立非所委寄失
才志欲就於升平行先迎於禍亂是猶將適越者指沙漠以遵途
欲登山者涉舟航而覓路所趣逾遠所尚轉難南北倍殊高下相
反求其至也不亦難乎況以新集易動之基而無久安難拔之慮
故賈充凶豎懷姦志以擁權楊駿豺狼苞禍心以專輔及乎宮車

晚出諒闇未周藩翰變親以成疎連兵競滅其本棟梁回忠而起
僞擁衆各舉其威曾未數年綱紀大亂海內版蕩宗廟播遷帝道
王猷反居文身之俗神州赤縣翻成被髮之鄉棄所大以資人掩
其小而自託爲天下笑其故何哉良由失慎於前所以貽患於後
且知子者賢父知臣者明君子不肖則家亡臣不忠則國亂國亂
不可以安也家亡不可以全也是以君子防其始聖人閑其端而
世祖惑荀勗之姦謀迷王渾之僞策心屢移於衆口事不定於已
旨元海當除而不除卒令擾亂區夏惠帝可廢而不廢終使傾覆
洪基夫全一人者德之輕拯天下者功之重棄一子者忍之小安
社稷者季之大況乎資三世而成業延二孽以喪之所謂取輕德
而捨重功畏小忍而忘大季聖賢之道豈若斯乎雖則善始於初
而乖令終於末所以殷勤史策不能無慷慨焉

晉書二

帝紀第三

蘇州府印

